

# JESUS CHRISTO NIYA TAWA-MANI

## MATTHEW TSIDYATRANI

- 1 ABRAHAM ga-iatra David ga-iatra Jesus Christo gowa tsüanishi dyika tsidyatrani.
- 2 Abraham Isaac iatraku; e Isaac Jacob iatraku; e Jacob Judah, e Judah ga-tyumutyaimishi ga-iatrakutya;
- 3 e Judah, Tamar kuitsa dyika si, Perez e Zera iatrakutya;
- 4 e Perez Esrom iatraku; e Esrom Aram iatraku; e Aram Aminadab iatraku; e Aminadab Naasson iatraku;
- 5 e Naasson Salmon iatraku; e Salmon, Rahab kuitsa dyika si, Boas iatraku; e Boas, Ruth kuitsa dyika si,
- 6 Obed iatraku; e Obed Jesse iatraku; e Jesse David rai tseshi iatraku; e rai tseshi David, Urias ga-okui tseshi dyika si, Solomon iatraku; e Solomon Rehoboam iatraku; e Rehoboam Abia iatraku; e Abia Asa iatraku;
- 8 e Asa Jehoshaphat iatraku; e Jehoshaphat Joram iatraku; e Joram Uzziah iatraku; e Uzziah Jotham iatraku; e Jotham Ahaz iatraku; e Ahaz Hezekiah iatraku; e Hezekiah Manasseh iatraku; e Manasseh
- 11 Amon iatraku; e Amon Josiah iatraku; e Josiah Jechoniah e Jechoniah ga-tyumutyaimishi iatrakutya ni
- 12 Babylon ye tsayatrutseyi. Babylon ye tsayatrutseyi si yuku, Jechoniah Shealtiel iatraku; e Shealtiel Zorobabel iatraku; e Zorobabel Abiud iatraku; e Abiud Eliakim iatraku; e Eliakim Azor iatraku; e Azor Sadoc iatraku; e Sadoc Achim iatraku; e Achim Eliud iatraku;
- 15 e Eliud Eleazar iatraku; e Eleazar Matthan iatraku;
- 16 e Matthan Jacob iatraku; e Jacob Mary ga-atru Joseph iatraku. Mary dyika si Jesus tyia. Wa Christo tsaaniatyishi.
- 17 She shrue sayu shitaiatyumishi, Abraham si yuku David hema katsi tyana tsitra tyaatyumishi, e David si yuku Babylon ye tsayatrutseyi hema, katsi tyana tsitra

tyaatyumishi, e Babylon ye tsayatrutseyi si yuku Christo hema katsi tyana tsitra tyaatumishi.

- 18 Mu taa tsa Jesus Christo tsiianishi: Ga-naia Mary, Joseph dyika taayaanityi, tsa na kuutsikumishi, Kukimuni Maiani dyika si tyikuunishi tyiemi chaetra.
- 19 She ga-atru Joseph, tawa hatrutsai ta, tsatsi Mary ga-nunani nitratyunu, makuma ai si yuku nikuyatyu chutsityishita. Taa kautsityishitani, Mu! hitseshi niya Kaunamatsi Huchani ga-upeseyi tyiemi tyiutrani tyana: Joseph, David ga-mutyi, bashrumi tyiutyushu kutra-okui Mary ushutsani, she tsikuunishi wa
- 21 Kukimuni Maiani dyika si tsa. Shrue wa mutye tsa noiasetyuku e niishratrashru Jesus, she emi ga-hanotyaaimishi ga-ukitsishetyishi si neyatraguku. Shrue towa sai tsi e-kaetra, emi heya Kaunamatsi Huchani prophet niya e-katsanishi e-naitraku, tyanata:
- 23 Imi me! Tu na maku-tsa n'kuutyu e mutye tsa noiasetyuku, e neyeshratanatsaumasa Emanuel, towa E-hashhi tyarapatyi tsiutrani Iusi sutruwataa tsa.
- 24 Shrue tyitrachuwa e emi Kaunamatsi Huchani ga-upeseyitanishi tsiyanikuiyanishi me e tyitra, e gaokui tyushutsa. She mi ga-mutyi ku-iasetyuma hema, tsatsi tyupakatsanu. She E-gashi JESUS tyishratra.

2 She e shru, Jesus ai Judea Bethlehem tsiaa ni, Herod emi e rai tsa ni, Magoi tsaitrunimishi hatrutsai ha ni si Jerusalem hau tyeetyu, tyana: Hatyi ga Horiyu dyika tsiianishi Rai? She wa ai ha ni si ga-shityita siukachana, e hau emi amoma sitranayee emi heya tuwe sutyeeuku. She rai tseshi Herod towa kaka ni, gowatyiutra e Jerusalem dyu sai hano gowa-shitawautra.

4 Shrue ai dyu sai heme chayani e tsidyatranikusana tsayawatyami, tyiwapeta hatyi Christo niatyu. E tania; Ai Judea dyu Bethlehem; taa she prophet niya tyidyatrani:

6 Juda hatsi dyu Bethlehem, Juda ga-uchani kotaa tsatsi hishrome mame drushinishi kutanu, she

kutyeshi si sa-hanotyaaimishi Israel nyeyawaatsikunishi Huchani niyumuku.

- 7 Shrue Herod makuma Magoi tyiwapeotsani chityi
- 8 chaautyu hamatsa shityita tyiukachana. E Bethlehem ye tyayayata e e-chatsa: Tyeekuma, e chityi owaka niya tsi niyaipanakutrusa, shrue shiyainawatyano, hawe si niupbenatyumasa emi heya nutyu mu hake hau amoma
- 9 nitranyesi. Shrue rai kukanatyai ai si yuku tyeeku, e Mu! wa ai ha ni tyiukachanatyishi shityita yuku yani chayatyuinai chityi hau hema owaka gaapishra dinya si chutyatsi. E shityita kuukachanatyia ni mame ma
- 11 ima tyiwauishityia. E katrutya ye hake tyiepu e owaka tyiukachana, ganaia Mary ishikawa, e chaashitotrume e hau amoma tyitrana, e ayaachani gowaushiputawatya tyiwayaityanimityi, uru, anye
- 12 bushrutyani tsimasha, e tsityumi uipushrutsi. E hitseshi niya Iusi tyiwapanatsa tsatsi Herod gaapishra ye si utsutsi, ishika dyika hiyani ye wa si ga-hatsityishra ye si tyeeku.
- 13 She ai si yuku tyeekuma, Mu! Kaunamatsi Huchani ga-upeseyi hitseshi niya Joseph tyukacha tyanata: Ipatyu, owaka e ga-naia paayutse e Egypt ye traapayu, e ai ni-shru mi hama tsika na si shraupbenu, she Herod
- 14 owaka niyumutyutsaku ni niyaipaku. E tsiipatyu e owaka e ga-naia gapushu ni tyaayutse Egypt ye wa tsutyu. Shrue Herod kushityi hema ai tya, emi heya Huchani prophet niya e-katsanishi e naitraku, tyanata: Egypt si sa-mutyi si-upbeotsa.
- 16 Shrue Herod kautyukunu Magoi tsiuitutranatyishi, mame chutsayawa, e tyayayata, Bethlehem nu e Bethlehem shra tsetyau dyu, hemakuma Magoi si kaautyumishi tsaashityi, sai dyu kushraityi ku nutsishu tseepishi mutye-tsa iatra chuwa. She chaimatsitratya prophet tseshi Jeremiah niya tyetsani tyanatani:
- 18 Rama dyu hau katsanishi takani, katyikuiyani e mame ayamakuni, Rachel ga-iatra niya katyikuiya, e tsatsi na tseemishi niya, tsatsi hushutsamatype.

19 Shrue Herod kushitoni, Mu! Kaunamatsi Huchani  
ga-upeseyi hitseshi niya Joseph Egypt dyu tyukacha,  
20 tyanata: Ipatyu, e iatra e ga-naia paayutse e Israel  
ga-hatsi ye ima, she iatra e ga-iani tsiyaipatyikuiya-  
21 natyishi kaawi. She dyu tyiipatyu, e iatra e ga-naia  
22 tyayutse e Israel ga-hatsi hawe wa si tsutyu. Shrue  
kakani Archelaus ai Judea dyika dyu huchani tyityitanu  
ga-naishityia Herod cha-hamashu, chuputsa hake  
uatsini, e hitseshi niya Lusi tyiupanatsa ni, Galilee  
23 ga-hatsi hatyi ye wa tsutyu, e Nazareth tsaashityitra  
hau tsaatsi e ai chukuiya, emi heya prophet niya  
tsatsanishi e-naitrakuni Nazareth-me niyenimasatsau-  
masatyishi.

3 Shrue wemakuma tsaashityiatani hawe tsutyu bap-  
tisma tsayatyita John Judea ga-hatsi tsatyau ye chu-  
katseta, e-chatsa: Kaunamatsi itye-tseshra hawe ena  
2 kaetyita, emi heya chuwataipunaime. She towa emi tsa  
3 prophet tseshi Isaiiah niya tsaatsanikuiyanishi tyanatani,  
Tsatyau hatsi ye kokatsetatyisu katsanishi, Hu-  
chani ga-hiyani haku piutranita, tsayatyimishi  
shitutsi peyatyitranita.  
4 Towa John gameyu hadrani niya chawakuni, e eshraka  
ga-isha shriona chaatyashityu, e chaupbewi tsiika  
5 e tsatyau-me tsishityini. She, Jerusalem-metra e sai  
Judea dyu-me e Jordan chuna ai shriona tsatyau-metra  
6 sai haupa hawe tyiawatseeku, e ga-ukitsishetyishi  
kowataipunaimetyishi, Jordan chuna nu John baptisma  
7 tayatra. She eku Parasai hano e Sadakai hano bap-  
tisma tyayatranishi dyika hawe tyeyekuiyatanishi  
kuwakachani e-tyayitsakuiya: Shruwi ga-iatratyaimi-  
shi, hau mani kutraiwatranani hawe tsunikunishi utsaya-  
8 wani si yuku utyetyuni? Shru eku uataipunaimishi  
9 niukumunishi niushranikunishi me e pitrana, e  
bashrumi chaatrutsityishitana naya si dyu atsani  
Abraham sutra-naishityiashi tsa. She e-shrayitsakuiya  
Lusi itye towa yaoni dyika si Abraham iatra  
10 neiatraku. She e shru mi kiwa tseshi gaya-wawaitrani

dyika si okupawani ga, shrue kiwa tsishi sai heme  
tsi tsa tawa tsa hitrani niyakasukunu, nu tsiupukawani  
11 tsiplashra dyika ye tsiipayatanisu. Hinome wa  
utaipunaimi niya tsitsi niya baptisma shrayatra, she  
eku etyu hinome dyika hamashu hawe tsunyekunishi  
wa shikuyetyinaimishi yuku tsishatsi, amo me, tsatsi  
ga-hashuimi niwaushiputashikunu, emi wa Kukimuni  
Maiani niya e tsipashi niya baptisma niyatra-  
12 kutruwatruma; ga-upuputsi kaikuiya, e ga-kawityiani  
shrami nayashikaku, e ga-ashrani uishitani dyika ye  
niushitaku, etyu bashra, tsa niepukakunishi tsipashi  
niya niyakaku.

13 She Jesus Galilee si tsutyu hau chuna Jordan  
14 dyika, John dyika baptisma naitrakunishi niya. She  
etyu John tyiunamatsani tyanata: Sekka hishrome nu  
baptisma nitratyuma, she emi wa hinome dyika tuwe  
15 tsutru? Shrue Jesus tyipeyutani taatsakuiya: Mena  
truheetsi. She ta shruwatyiku sai uitonimi uwashu-  
16 trani. She tyiuhheetsani. Shrue Jesus baptisma tsitrani  
haikamitsi tsitsi dyika si dyu tsutyu; e Mu! kowatyuma  
taatawita, e huuka tsiyatanishi me Lusi ga-maiani  
nuku tsutyunishi e ai si dyu tyukuiyanishi tyiukacha;  
17 e Mu! kowatyuma si nu katsanishi e-chatsa: Towa  
sa-mutyi tsa, tsiutsimunishi, emi niya shikunama.

4 Shrue Jesus shruwatyamu niya nyeetanatyunishi  
niya tsatyau ye Kukimuni Maiani niya taayutsee.  
2 E tyana-wa-katsi tsaashitya-ma e tyana-wa-katsi bishu  
3 kushruikani si yuku tyiyamashito. E tsiutanikuiyanishi  
hawe tsiyatyami e taatsakuiya: Tsi Lusi ga-mutyi emi  
4 kutanu, chuwaya towa yaoni semita paetra. She etyu  
tyipeyutani tyanata: Tsiyatranani, hano tsatsi tu me  
semita niya nutraityanikusatyanu, etyu Lusi tsiika si  
5 kumunishi sai ga-tsenityi niya. Shrue shruwatyamu  
tsityumi tsaashityitra ye dyu tsiyutsemi, tsityumi-  
katrutya ai dinya drutrutya si dyu tsikuiyani taatsa-  
6 kuiya: Tsi Lusi ga-mutyi emi kutanu, nu chaित्रachanae.  
She tsiyatranani,

Wa ga-upeseyitanityaimishi neyayanikuiyaku,

MATTHEW 4

Hishrome niya, gayamashityi niya nyeematashi-kutrumasa emi heya tsa shra-ashityi yaoni dyika noupaitsi-shrunu.

- 7 Jesus e-taatsakuiya: Tsika na tsidyatrani,  
Tsatsi Huchani kutra-Iusi niutanikuiya-shrunu.
- 8 Tsika na shruwatyamu mame tiye dyu kotyu ye dyu tyiyutse e gaishibishra dyu sayu we hatsishra e gayanamatseshi hawe tyiutrani; e taatsakuiya: Tsi hinome dyika nu shra-ashutotruma e hau amoma-tyiutranu,
- 10 sai tsi towa niuyanishroma. Shrue Jesus e taatsakuiya: Yuku ima, Satan, she tsidyatrani:  
Huchani kutra-Iusi dyika hau naashutotru-shru, e emi nowe niukasha-shru.
- 11 Shrue shruwatyamu ai yuku si tsutyu; e Mu! gaupeseyiyaimishi hawe tyeeuku e tyiukashana.
- 12 Shrue Jesus kakani John taatyaweeetyishi, Galilee  
13 ye tsutyu; e Nazareth dyika yuku tsuku ni, Capernaum ai hau taatsi e ai chukuiya; (towa Capernaum Zebulon hatsi e Naphtali hatsi kuupichanishra e gaawashra butru si dyu tsaashityitra ta); emi heya prophet Isaiah niya tsatsanishi e-naitrakuni, tyanata ni,
- 15 Zebulon ga-hatsi e Naphtali ga-hatsi, gaawashra tsaityawi hiyani, Jordan chuna wewisa, nanami hano Galilee gaashetyishi. Tsamishityitsi tseemishi hano tseyatynishi mashra tseshi tyiukachana, e hushitoni ai gaapishra e ga-unushiputyushra-gaya ai tyeemishi mashra, tyiwautra.
- 16
- 17 Emi tsaashityi si yuku Jesus shru chukatseta e e-chatsasu: Kaunamatsi itye-tseshra hawe ena kaetyita, emi heya chuwataipuniame.
- 18 E Jesus Galilee kutaa butru gaanitruityeya ni, dyue kuutyumutyaimishi, Simon taniatyishi Peter, e gatyumu Andrew tyuukacha, napapatsishi tsitsi dyika nu gaa-uityani, she shikaashu tyaaityatyikuiyanu; e tyaatsakuiya: Tuwe hamashu tyeema, e hano kayatyatyikuiya neyetrashrauma. E tu haikamiku napa-patsishi tu tyayatranutyu e hake hamashu tyeeyu. E

MATTHEW 4, 5

- ai si yuku tsuku ni, tsika na dyue kuutyumutyaimishi tyuukacha, Zebedee ga-mutyi James e ga-tyumu John, kanue dyika dyu gaa-naishityia Zebedee tyee, gayanapapatsishi si tawa tyatyatyia. E tyuuepotsa. E tu haikamiku kanue e gaa-naishityia ai tu tyaaitra e hamashu tyeeyu.
- 22
- 23 Shrue Jesus sai ai Galilee-shra chaanitruityaya, aiwatyami-gaya gaishimishetyishi ye tayasomeshitasu, e Kaunamatsi itye-tseshra niya tawa-mani chuka-tsetasu, e hano dyika sai tsi shra kui tse shitawawasatyishi e sai tsi shra kui tse hiyatsani tyuwatsai-punaisu. E tsaanimasatyishi Syria sai ai shra tsutyu; e sai tsi shra kui tse hiyatsani e tsunatyumenishi shitawawasatyishi hano e ganatyaya-tsayatatyishi e ka-tsiyishitani-tsiwatuityishi e tayaawishi hau taya-watrutseyatannita, e tyiwatsaipunaii. Shrue Galilee si, e Decapolis si, e Jerusalem si, e Judea si, e Jordan chuna wewisa si mame tsi hanowishi hamashu tyiwatsekkuiya. She tsi hanowishi kuwakashani, kotyu ye dyu tsutyu shrue ai si nu chukuiya ni, gayasomeshitanishi hawe tyeeuku; e tsiika tsaata e tyayisomeshita tyanatani:
- 5
- 2 Gayiuiyeetyi ga-maianishi amoma kaaumasatyishi, she Kaunamatsi itye-tseshra gashi.
- 3 Gayiuiyeetyi ayamakusatyishi, she nyiwashutsaniku.
- 4 Gayiuiyeetyi shrana-kusatyishi, she gaishibishra nutrauiyaanikusa.
- 5
- 6 Gayiuiyeetyi uitonimishi dyika ye wa gaitramashityishi e gaipanoshitoshi, she nayatrukaeku.
- 7 Gayiuiyeetyi gayatyuityishi, she niwatyuityiku.
- 8 Gayiuiyeetyi gaya-winoshika tsiuyashityimishi, she Iusi niukachana-kusa.
- 9 Gayiuiyeetyi bishityi gayatyityia, she Iusi ga-iatra niyetrunimasaku.
- 10 Gayiuiyeetyi uitonimishi kutsi niya tsaimanityishi, she Kaunamatsi itye-tseshra gashi.
- 11 Kutrayiuiyeetyi su-tsi niya sutsi me neyania-kutru-watrumasatyanu, e neyimanitsi-kutruwatrumasatyanu,

12 e bato tsa chaimatsishranu, sai tsi kui-tsheshrama  
sutsi tsheshi neyania-kutruwatrumasatyano. Truwa-  
nama e mame truwaushityia, she Kaunamatsi dyu  
tseyatymishi niaitsuwani-kutruwatrumasa, she emi  
taa hishrome hama tsheshi prophets gayamanitsina.

13 Hatsi dyu mina kutaapu; etyu tsi mina tsatsi mina  
me e-kaetranu, gowa mina niutraniku? Ai si yuku  
tsatsi tsi niutyawakunu, tu heme nyiuitsikumi e shrue  
14 hano gayashityi naya niyatanikuiyaniku ni. Gaishi-  
bishra mashra kutaapu. Kotyu dyu tsaashityitrashra  
15 tsatsi itye n'ushikumakumishra. Ku tsatsi hano ana-  
trani nyenatrakusatyanu e shrue uityimi naya ye  
nyipunaima-kusatyanu, etyu anatrani-uityitsimi si dyu  
nyityitsikusa, she katritya sai haupa ai shra gaya-  
16 natrasu. Taa mashra kutraishimishi hano dyika ai  
yani si payanatra, emi heya tawa kutraitani niuka-  
chanakusanu e shrue Kaunamatsi gaapishi kutra-  
naishityiashi niuamashitanakusanu.

17 Bami chaatruitsityishityia utsitokaii e prophets sutsi  
nitrasinishi niya hawe tsesushi. Hawe tsusinishi wa  
tsatsi sutsi utranishi niya, etyu washutranishi niya.  
18 She kaimatsi shrayitsakuiya menashru gaishibishra e  
Kaunamatsi tsatsi na hatyi tsanu, tsatsi drusishu puta  
ku koimi puta utsitokaii dyika yuku n'yetyikunu,  
19 menashru sai tsi tsiwashutranishra. Towaya hautsi  
koimiku towa tsiuwayanishi kaukayutsari, e taa hano  
nyeyasomeshitakunu, Kaunamatsi itye-tshesra dyika  
dyu chai-me nyeenimasaku; she eku etyu, hautsi  
e-tsitranu e niisomeshitakunu emi Kaunamatsi itye-  
20 tshesra dyika dyu mame nyeenimasaku. She shrayi-  
tsakuiya, emi tsi tsa kutra-uitonimishi tsidyatraniku-  
sana e Parasai hano gaya-uitonimishi yuku nutse  
n'takunu, tsatsi Kaunamatsi itye-tshesra dyika ye  
nityeepu-kutrusatyanu.

21 Kutra-ka ni hama tse hano niya tsanatani tsatsi  
niyawashrunu; e hautsi tsayawanu gaunashiyani nie-  
22 tanakunishi; etyu shrayitsakuiya, hautsi ga-tyumu dyika  
kotsayawanu, gaunashiyani nietanakunishi, e hautsi

ga-tyumu tsatsakuiya, *Peshana*, gaunashiyani kowa-  
chani dyika ye nieyutsekunishi, she etyu hautsi  
kanata, Tsa kowakunii, gaunashiyani shruwatyamutse  
23 tshipashi niya. She tsi kutra-ashityiakumishi ai-  
ashityiakumishra dyika ye shraikkuiya e ai kutra-  
tyumu haityi tsi niya tutruiyani shrutyumishranu,  
24 kutra-ashityiakumishi ai ashityiakumishra dyika picha  
e yuku ima, tsaya kutra-tyumu chayashutsanu, shrue  
hawe si ima kutra-ashityiakumishi chaashityiaku.  
25 Kutyiupinaimiyishi shatru truushrani, tu na hiyani ye  
kutyeeyani; tsi shru tsi kutyiupinaimiyishi tsayatani-  
kuiyanishi dyika hau kutyikuyan, e shrue tsaya-  
tanikuiyanishi tsayatyatyikuiya dyika hau kutyiku-  
yanu, e shrue hishrome utsitani dyika hau shaapu-  
26 naimetyanu. Kaimatsi shrayitsakuiya, mame tsatsi  
itye niuushrunu menashru sai tsi shraitsuwanu.

27 Kutra-ka ni tyanatani, tsatsi tuwe nyeiauia-shrunu;  
28 etyu shrayitsakuiya hautsi tsiutsiputyishi me ku kume-  
29 kumenu, mishru ga-winoshika dyika tsiuia. E tsi  
shrumikawaya kutra-ana anachupatsi kutyityitanu,  
tyiupuku e tratyitru, she tseyatymishi yuku kutrayi-  
uiyeetyi shini si tu drusishu tu kutrutranu e tsatsi sai  
30 shini shruwatyamutse ye nu tsaawinu. E tsi shrumi-  
kawaya shramashityi anachupatsi kutyityitanu, yuku  
chutsutrusa shrue traawi, she tseyatymishi yuku  
kutrayiuiyeetyi shini si tu drusishu tu kutrutranu e  
tsatsi sai shini shruwatyamutse tsunyekunu. E tsika  
31 tsanatani, tsi hautsi ga-okui yuku-tsikuyan, yuku  
32 ayakuyani tsidyatranu peeou; she etyu shrayitsakuiya,  
hautsi ga-okui yuku tsikuyan, tsi tsa aianowitsitani  
niya, tuwe uiani kaukitsa tsitra, e hautsi yuku tsiu-  
kuyanishi tsika tsiwakuitranu, tuwe uiani kaukitsa.

33 E tsika na kutra-kani hama tse hano niya tsanatani,  
bami tsa kaimatsishi me chaakaesukuiyanu, etyu  
34 Huchani dyika kutra-akaesuni e piwashutra; she etyu  
shrayitsakuiya, bami mi chaakaesukuiyanu, tsatsi  
35 Kaunamatsi niya, she Iusi ga-upishishra tsa, ku tsatsi  
hatsi niya, she Iusi ai dyu kaashityishani tsa, ku

36 tsatsi Jerusalem niya, she tsichu Rai ga-ashityitra tsa, ku bami shra-nushika niya chaakaesukuiyanu, she  
37 tsatsi itye ishike puta kutra-hadrani shamutsi ku mishityitsi nitra-shrunu. She etyu emi shratsanishi Ha, Ha; Tsa, Tsa, pee; she haityi towa mina yuku tsanu sutsi dyika si kumu.

38 Kutra-kani tyanatani, Hoanani hoanani niya tsa-  
39 aitsuwani, e hachani hachani niya tsa-aituwani; she etyu shrayitsakuiya, bami sutsishu hano tseshi pu-yeetsani, etyu hautsi shrumikawaya shruwapu kutru-tyishatsa, ishika shruwapu tsika hau piwishingutrai.  
40 E tsi hautsi kutyi-waitawanu, shrue naya dyu kutra-wakuni kutru-satyutsanu, tsika hau dinya nu si  
41 kutra-wakuni nyeou-shru. E hautsi sekka kutyi-tranu  
42 ishike mia utsutsi, dyue mia chutyimutyu. Peou hautsi kutruitaanishi, e hautsi niushitsa-kutrumanishi, bami yuku piawa.

43 Kutra-kani tsanatani, Ai kutraama yuwi si nu gaamishi niutsimushru, e kutru-yanishi niuyanishru;  
44 etyu shrayitsakuiya, kutru-yanisatyishi niwatsimukutrusa e kutyi-manitsishetyishi amoma paiwatraani;  
45 emi heya Kaunamatsi gaapishi kutra-naishityiashi nyeya-mutyi-kutruwatrumasa; she sutsi tseshi e tawa tseshi dyika dyu ga-oshratra tsishibitratyusu, e shrami tseshi e tsa shrami tseshi dyika dyu tsachanawita.  
46 She tsi kutraya-tsimunityishi kutruwa-tsimunu, tsi haityi nutrayaishiawa-kutrusa? Kume tsa hemaku  
47 kayakitaukuiyana e-taa? E tsi nowe kutra-tyumutyaimishi Gowa Tsi shrayatranu, hatsushu shitrana?  
48 Kume tsa nanami hano emi e-taa? Emi heya Kaunamatsi gaapishi kutra-naishityiashi tseyatyimishi-me e-tsekuiyanishi, emi taa trutyu mu tseyatyimishi-me e-n'taapu-kutrusa.

6 Tsatsi kutraya-uitonimishi hano dyika ai yani, tuma hano niyekachanakutruwatrumanishi niya e-nitrana-kutrusatya ni bashru nutrusa-kutrusa, tsi shru tsi tsatsi Kaunamatsi gaapishi kutra-naishityiashi si  
2 nyeyaani-kutruwatrumasatyanu. She uyaityani hau e

nitrana-kutrusatyi, bami yuku yani uputsi puputsanu, emi e gayauitutyityia e tsityityiata aiwatyami-gaya ai gaya e hiyani ye tuma hano niwakutsa-tsiwatrumanishi niya e-tsaa. Kaimatsi shrayitsakuiya, mishru gaya-yaaniwa. She etyu uyaityani hau e-nitra-shru ni, bami ishuya shramashityi piutoni tsi haityi shrumikawaya shramashityi kui tsitranshi; emi heya kutra-uyaityani niushikumashityiku, e ushikumashityi niya kuukachanishi kutra-naishityia nyeyaani-kutruma.

5 E tsika, amoma shitrantati, tsatsi gayauitutyityia-me e-n'taapu-kutrusatya; she niwakachana-tsiwatrumasanishi niya aiwatyami-gaya ai gaya e hiyani shukuna dyika ye tseechanishi amoma utytani anye-kusa.  
6 Kaimatsi shrayitsakuiya, mishru gayayaaniwa. Etyu hishrome, amoma shitrana, wa ai gaya ye niupu-shru, e tsiama shaashani kuishikumashityi kutra-naishityiashi hau si amoma pitra; shrue kuishikumashityi kutra-naishityiashi kuukachani nyeyaani-kutruma. E amoma shitrantati bashrumi kee si e tratsiatyasu, nanami hano me; she tsinaitranishi naoya atsani niya niwakana-tsiwatruma. Bami we me tyeeshi, she tsa na shruwita, mishru kutra-naishityia kutoni tsi niutsipu-kutrumanishi. Shruue taa amoma pitrana:

9 Sutra-naishityiashi, Kaunamatsi dyika shraapishi, E-shrashi tsityumishi pee. Kutra itye-tshetra hawe si ima. Emi e kutra-uwayanishi Kaunamatsi dyika dyu e tsiutranishi, tsika emi e hatsi dyika dyu e-paitra. Tsaashityama sutra-upbewishi towa tsaashityi hau ye gaiwatrani. E sutaaputyishi dyika kukitsanatyishi siwawataipunaityishi me, emi e nutrumu  
12 sutra-ukitsishi gowawataipunaii. E bashrumi ayatanikuiyani dyika ye gaitrutseyata, etyu sutsi tseshi dyika si gayatoinaii. She itye kutrashi, tsishatsi kutrashi, uamashitani kutrashi, tsiyakamitse. Taa pee.

14 She tsi hano ga-ukitsishi shruwawataipunaimanu, kutra-naishityiashi Kaunamatsi gaapishi niwawatai-

- 15 punai-kutruwatrumasa. Etyu tsi tsa hano ga-ukitsishi shruwawataipunaimanu, kutra-naishityiashi tsika tsatsi kutra-ukitsishi niwawataipunaima-kutruwatrumasatya.
- 16 She e tsika, hama shruwashruikametyanu, bami gayauitutyityia-me amome-tsa kutruwawawi n'taapu-kutrusatya, she kowawaw-shikutru-taityia kuwashruikashisu hano niwakashana-tsiumanishi niya.
- 17 Kaimatsi shrayitsakuiya, mishru gayayaanawa. Etyu hishrome, hama shrushruikanu nayaitashru e nanawai-shityi-shru; emi heya shrushruikanishi tsatsi hano dyika tyiemi n'takunu, etyu ushikumashityi niya kuukachanishi kutra-naishityia dyika, shrue kuishikumashityi kuukachanishi kutra-naishityiashi nyeyaa-ni-kutruma.
- 19 Bami tui gaishibishra dyu shruwatruksi niya tsityumishi pishityia, ai hatyi mita e mayatra tsiupbeukuiyanishra, e kuwachawaityia niutroshita-kusatyishi nuwachawana-kusatyishra; etyu Kaunamatsi dyika dyu shruwatruksi niya tsityumishi pishityia, ai hatyi mita e mayatra tsatsi tsiupbeukuiyanishra, e ai hatyi kuwachawaityia tsatsi niutroshitakusatyishra e tsatsi nuwachawana-kusatyishra. She ai hatyi kutra-tsityumishi
- 21 kutrashishra ai tsika kutra-winoshika ni-ku. Hoanani tsini ga-anatrani tsa. Shrue tsi ishikawa kutra-ana
- 22 ishike-me tsanu, sai shini mashra tsa. Eku etyu tsi kutra-ana sutsi tsanu, sai shini tsamishityi tsi. E shrue tsi kutra-mashra mishityitsi tsanu, hatsumaku tsamishityi tsi! Tsatsi hau itye dyue yani-tseetyishi niutsitokaiikunu, she ishike niuyaniku, etyu ishika niutsimuku, ku ishike niukinitrniku, etyu ishika tsatsi tsi niukunu. She tsatsi itye Iusi e tsityumishi shikaewa
- 25 niutsitokai-kutrusatya. Emi heya shrayitsakuiya, kutraianishi niya bashrumi mamutyi chuwasityishityia, tsi nupbe-shrunishi e tsi niishika-shrunishi, ku e tsika shini-kutrashi niya tsi niwaku-shrunishi. Gao tsa iani upewi yuku tseyatyimishi ta, e gao tsa tsini wakuni
- 26 yuku tseyatyimishi ta? Puwakachana howaka ye gayatanishi, wa emi tsatsi kautyisetya e tsatsi

- kowawaityiatya e tsatsi kowaushityityiatya; she etyu kutra-naishityia Kaunamatsi gaapishi gayityisheta. Kume tsa gayatanishi yuku tseyatyimishi yatra
- 27 tyitaapu? Hau ye emi kautsityishitanu itye ishike
- 28 kamashityi-tsiwityimi kotranishi nityaoku? E tsika, tsekoma wakuni niya tsityishityi-kutrusa? Chuwasityishityia tsaishra ye agutruksi, gowa kaatonityishi.
- 29 Tsatsi kowatanitra, e tsatsi kuwakatsisu; she etyu shrayitsakuiya, Solomon mame dinya kaukenatsi tsatsi
- 30 tumaku kuwaku. Etyu tsi Iusi hemaku tsaishra gamushru tsiwakunu, emi wai eetse e nachama bahuishitani hake niukuyawiku, kume tsa mina yuku niyawaku-tutruwatruma? Mame koimi kutruwahimatyishi! Shrueku bami tsityishityi-trusa e trana, Tsi n'traape-sutrusa? ku, Tsi n'traashikata-sutrusa? ku,
- 32 Tsi n'truwawaku-sutrusa? She sai tsi towa nanami hano tsiyaipatyikuiyana; she etyu Kaunamatsi kutra-naishityia kutoni sai tsi towa nyiwyawa-kutrumanishi.
- 33 She etyu tsaya piyaipana Iusi itye-tseshra e Iusi gauitonimishi, shrue sai tsi towa hau nyeyawityami-kutruwatruma. Emi heya bami nachama niya tsityishityi-trusa, she nachama noyu tsityishityi-nautraku.
- 34 Wai sutsi kaetranishi mishru wai washu tsa.
- 7 Bami tuwe tsi peyanaitrani emi heya trutyumu
- 2 tsatsi tuwe tsi nyeyanaitrani-shrunu. She tsi haityi shiya shayanaitrani-shru, taa tsika nyeyanaitrani-shru; she haityi uityimi heya shityimetya,
- 3 tsika emi heya nyeeuityimi-kutruwatrumasa. E tsekoma kutra-tyumu ga-ana ai nu drusishu puta tsiuwamunishi shrukachanikuiya, etyu kutra-ana ai nu pitrami kutruwamunishi tsatsi tsi shrunu? Ku gowa kutra-tyumu nietsakuiya-shru, Kuyani kutra-ana nu kutruwamunishi dyu kaoku, etyu Mu! pitrami noyu
- 5 kutra-ana nu kutruchu? Kaututyityia kuta! Tsaya noyu kutra-ana si dyu pitrami puku, shrue menashru tyiemi niukacha-shru kutra-tyumu ga-ana nu tsi
- 6 drusishu puta tsiuwamunishi dyu ukumi. Bashrumi tsi tsityumishi diya payawachani, ku bashrumi kutra-

ushityikuni petsoty hake yani payawakuiyawimi, tsi  
 shru tsi gayatanatya, shru tsi kaishigutrainu e kutyi-  
 7 ushratyitsanatya. Chuwautana, shru niyaapi-kutru-  
 watrumasa; piyaipana, shru niyainawa-kutrusa; pu-  
 8 pinatsana, shru niaatawita-kutruwatrumasa. She  
 haupa kuwitaanishi, tsayaapi; e tsiyaipasushi tsiyainasu  
 e hau kupinatsanishi, nieetawita-tsaumasa. Ku  
 9 hau ye emi hatrutsai hau ga-mutyi tsi semita  
 10 kuwitaanu, kume yaoni niutyityu? Ku tsi shikaashi  
 11 kuwitaanu, kume shruwi nyeutyu? Shru tsi sutsi me  
 kutaaputyishi gowa tawa ayaapi tseshi kutra-iatratyai-  
 mishi dyika kutrusatya-ayaapi, hatsumaku yuku kutra-  
 naishityia Kaunamatsi gaapishi tsi tawa tseshi  
 12 tyuitanakuiyana nyeyaouku? Shru sai tsi hano  
 nyewatranita-kutruwatrumasanishi e kutruwatsiputya,  
 emi e trutyumu nyewatranita-kutrusa; she towa  
 utsitokai tsa e prophet tsa.  
 13 Drugashuka tsiana ye hake tyiepu: she ayataani  
 dyika ye tsunikunishi wa gachuka tsiana tsa e tsiya  
 hiyani tsa, e mame tsi hanowishi hake tseepusu.  
 14 She etyu iani ye wa drugashuka tsiana e drutsiya  
 hiyani tsa, e tsiyainawatyishi mame hatsue tsaapu.  
 15 Tsa kaimatyishi prophets truwayukai; she kanieru  
 gawakunishi kuwaku ni haweku kutruwawatsekuiyata,  
 16 etyu naya ye kкана kautanishi me e-tsaapu. Emi wa  
 hitrani niya niyetrnimasa-kutrusa. Ipani si kume  
 hano mataiku chaautyityia? ku haika si figs chaautyi-  
 17 tyia? Emi taa sai tawa kiwa tsishi tawa hitrani  
 tsiyakasu, etyu sutsi kiwa-tsishi sutsi hitrani tsiya-  
 18 kasu. Tawa kiwa-tsishi tsatsi itye sutsi hitrani  
 niyakasukunu, e sutsi kiwa-tsishi tsatsi itye tawa  
 19 hitrani niyakasukunu. Kiwa tsishi sai heme tsi tsa  
 tawa tsa hitrani niyakasukunu, tsiupukawani tsiplashra  
 20 dyika ye tsiipayatanisu. Shru wa hitrani niya niye-  
 21 trunimasa-kutrusa. Tsatsi mame sai heme, Huchani,  
 Huchani, shikatsakuiyanu itye Kaunamatsi itye-  
 tseshra niupukunu; etyu Kaunamatsi gaapishi sa-  
 22 naishityia ga-uwayanishi e tsekkuiyatyishi. Emi e

tsaashika ni mame naoya hanowishi niyenia-shikuma-  
 23 sa, Huchani, Huchani, Gao tsa E-shrashi niya tu-  
 traesomeshityia, e gao tsa E-shrashi niya ganatyaya  
 tayiwaytikume, e gao tsa E-shrashi niya mame naoya  
 24 imi-me ishatsini titrana? Shru niyetsakuiya-si tsatsi  
 hama shrayitrunima; sutsi me shruwatanitranishi yuku  
 tyeeukuma.  
 24 Emi heya hau tsi towa sa-mani kakanu e emi e-  
 tsekkuiya, tsi kutonishi hano nishigayunawa-si, wa ga-  
 25 ama yaoni si dyu kaatra; shru chaacha e tyuichumu  
 e natrani tyeeshitaya, e shru towa katrutya tyusha-  
 yana e tsatsi putyanu, she ai yaoni dyika si dyu chinu-  
 26 tsani. E hau tsi towa sa-manishi kakanu, e shru tsatsi  
 emi e tsitranatya, tsa kuwakunishi hano nishigayunawa-  
 27 si, wa ga-ama yaai si dyu kaatra; shru chaacha e  
 tyuichumu, e natrani tyeeshitaya, e shru towa katrutya  
 tyushayana e putya, e mame maima putya.  
 28 Shru e chaetra Jesus towa mani kaunaottani,  
 hanowishi tsi gayasomeshitanishi niya imima tayatra.  
 29 She itye e gashi me tayisomeshita, e tsatsi tsidyatra-  
 nikusana me.  
 8 E kotyu hawe si nu tsutsi mame tsi hanowishi  
 2 hamashu shichaku. E Mu! Leper niya tsiyatsanishi  
 tuwe tsutyu, e amoma-tyitra, tyanatasu, Huchani, tsi  
 3 e-shrunu itye niukayatyuma. Shru Jesus kamashityi  
 hau chaotta e tyiupakatsa, tyanatani, E-si, trukaya.  
 4 She tu haikamiku ga-leprosy tyiukayawi. Shru Jesus  
 taatsakuiya, Bashrumi hautsi pupe; etyu hake ima,  
 chayani putrukacha, e emi chayanishi dyika nityiem-  
 tranikunishi niya Moses ga-uwayanishi ayaapi hawe  
 niutrani-shru.  
 5 Shru Jesus Capernaum tsaashityitra ai hau tsaatsi  
 ni, katsi-wa-katsi kawaipetyia yani-tseshi hawe tsutyu,  
 6 tyiuitanikuiya tyanata, Huchani, sa-tanitrani katrutya  
 ai tsikai yayu niya tsiwasa e mame tsiunatyumita.  
 7 Shru Jesus taatsakuiya, Hawe tsunisi, niutsaipunawa-  
 8 si. Katsi-wa-katsi kawaipetyia yani-tseshi tyipeyutani  
 tyanata, Huchani, hishrome saama sutamishi hake



- naya ye niupu-shrunishi, hinome tsatsi yatra shityanu; she etyu tu me mani e tratsa, shrue sa-tanitrani niutsaipu-tsiumanu. She nutyumu sa-utsitokaiwani wa, e hinome dyika naya kawaipeyia suwatrukai, shrue towa hatrutsai seetsakuiya Ima, shrue tsuku; etyu ishika, Tuwe ima, shrue hawe tsuku; etyu sa-tanitrani, Towa e-pitra, shrue e-tsitra. E Jesus kakani tyiwanutsa, e hamashu tsekkuianishi tyayitsakuiya, Kaimatsi shrayitsakuiya, tsatsi hemaku uhimatyi shityiyaina, tsa, tsatsi Israel hano dyika si. E e-shrayitsakuiya, mame tsi hanowishi yue ha ni e yue bu ni nityeekukusa, e Abraham e Isaac e Jacob haupa ai Kaunamatsi itye-tseshra si nu naatakusa, etyu itye-tseshra ga-iatratyaimishi chaatya ye tsamishityi-tseshra ye niyatani-tsiwatrumasa. Ai niyetyikuiyaniku e hachani nyeiushikunutsitaniku. Shrue Jesus katsi-wa-katsi kawaipeyia yani-tseshi taatsakuiya, Ima; she emi e kutru-himanishi emi hishrome e putrutra. E ga-tanitrani emi e ura tsa ni tyiutsaipu.
- 9 E Jesus Peter ga-ama hake kupuni, tyiukacha Peter ga-okui ga-naia gaachatayishi niya tsiwasanishi ai tyikai. E kamashityi tyiupakatsa, shrue gaachatayishi tu tyitra. She dyu tyiipatyu e tyuikasha. Shrue shapuka ni ganatyaya-shityityayishi naoya tsa watrutseyatanita, e ganatyaya si taiwatyikumi ga-mani niya; e sai tsi-wawasatyishi si tyayiwatsaipunaii. Emi heya Prophet-seshi Isaiah niya katsanishi e-naitraku, tyanata: He noyu sutra-hiyatsani chaokuiya, e shrawawasatyishi sai chaatyeya.
- 10 Shrue Jesus mame tsi hanowishi ai shriena tseemishi kuwakachani tayayanikuiya, wewisa hake utsutsi. Shrue tsidyatranikusu hawe tsutyu e taatsakuiya: Tsayasomeeshita, hamashu niyetrutye-shrauma hekota tsushrunu. E Jesus taatsakuiya: Tsushiki gowatrotyi, e howaka gayatanishi gowawaa; etyu hano ga-mutyi tsatsi tsi hatyi ai ga-nushika niyenamatyikunishra tsanu. E ishika haityi gayisomeshitanishi taatsakuiya; Huchani, kuheetsani tsaya hake si utsutsi, sa-naishityia

- 22 utyaitsimi. Etyu Jesus taatsakuiya: Hinome dyika hamashu ima, e kaashitonishi noyu kaawishi peetyaitsime. Shrue kanue dyika dyu kupuni, tayisomeshitanishi hamashu tyiwatsekkuiya. E Mu! Kanue dyika dyu chutashikatsita heme tsitsi kutaa dyu mame tsishatsi tyunatratya, etyu tsiipai. E tayisomeshitanishi hawe tyeeuku, e tyitrachuwana, tyana: Huchani, gayatragu, naawishrusa. E tyayitsakuiya: Tsekoma shraaputsanishi, Tu koimi tsiwahima? Shrue si dyu tyutaatyu, e natrani e kutaa tyiunamatsa; shrue mame bishityi chaetra. E we hatrutsai mame chaaputsa, tyana: Tsi kui tse towa hatrutsai tsa, e mu puta natrani e kutaa tsiutsitokaii.
- 23 Shrue wewisa Gadarine hano ga-hatsi dyika tsaatsini, dyue ganatyaya-tsaatyatyishi shumu ai-ityaitsimishra hawe si tyuumu tyiwataimutyu mame taanowani, tsa hau hano niyatukuni me. E Mu! Tyuushigaitsa tyanikuiya: Tsi haityi dyika shrui ni sutaa, Iusi gamutyi? Tsa na chitye kaetrani tuwe tsutru kuwanieityitatumanyishi niya ka? She ai si yuku tiye tseshra dyika naoya tsa petsoty tsiwatsi ai nu tyaape. She ganatyaya tyiwittaana tyana: Tsi si tyiwyatikuma, gaiwaheetsani petsoty tsiwatsishra dyika ye utsutsi. Shrue tyayitsakuiya, Tyeeekuma! E hawe si tseemu ni petsoty tsiwatsishi dyika ye tyeeuku. E Mu! Sai tsiwatsi petsoty roku me tsitsi kutaa dyika katuwina ye nu chaya-petsa, shrue tsitsi dyika nu sai chaawi. E kuwawaa tseshi tyappayu, e tsaashityitra ye nu tyeeuku e sai tsi tyipenu, e tsi kui kaetranishi ganatyaya tsayityayishi niya. Shrue, Mu! Tsaashityitra hano sai haupa hawe tyeeemu Jesus tyiwataime, e tsiukachanaty tyiwittaana gaya-hatsi yuku si utsutsi.
- 9 She kanue dyika dyu tyiupu e tyumu, e noyu gashityitra hau si taatsi. E Mu! Yau niya tsiwasatyishi taayutsemitta, uityityi dyu tyikai. She Jesus uhimatyi gashi kukachani, yau niya tsiwasatyishi taatsakuiya: Ga-mutyi, tru-uishityia, kutra-ukitsishi truwataipunaimi. Shrue Mu! emi eyu tsidyatranikusana naya si

dyu e tyatsia: Towa hatrutsai sutsi-me katsetatyasu.

4 E Jesus kaatsiyishitanishi kutoni, tyanata: Tsekoma sutsi me kutra-winoshika naya dyu shruwatsityishityia?

5 She haityi kaosa anatani tsa, Kutra-ukitsishi truwatai-punaimi; ku, Ipatyu e anitruyeya? Etyu hano ga-mutyi

6 tui hatsi dyu ukitsi ayataipunaimi itye e gashi niutoni-masa-kutrusa . . . Shrue yayu niya tsiwasatyishi taatsakuiya: Ipatyu, kutra-uyityi si dyu pita, e kutraama

7 ye si ima. Shrue tyiipatyu, gaama hake si tsutyu.

8 E tsi hanowishi kuukachanaty chaaputsa, e Iusi tyiamashitana she hano dyika we me itye gayaapishi niya.

9 Shrue Jesus hake si tsiyetyutsi Matthew taniatyishi hatrutsai tyiukacha, aitsuwani-aitsuwanishra ai si tya, e taatsakuiya: Hinome hamashu ima. She dyu tyu-taaty e hamashu tsutyu.

10 She e chaetra, Jesus katrutya gaya kaauyatakuiyua ni, Mu! naoya kaukitaukuiyana e kukitsityia hawe tyeeuku e gaapishra e gayisomeshitanishi haupa ai si nu chaata. E Parasai hano towa kuukachanaty, gayisomeshitanishi tyayatsakuiyana: Tsekoma kutrayasomeshita kaukitaukuiyana e kukitsityia haupa shrauyatawa? Etyu Jesus kakani, tyayitsakuiya: Kuwanatsanishi tsatsi wawakusu tsiwatsiputyana, gaityi emi tsiwawasatyishi. Etyu hake tyeeukuma chuwatyumitra tsi emi towa mani tseshi, Ayatyuityi shikutsipu, e tsatsi uyaityani. She hawe tsuseshi wa tsatsi shrami tsaaputyishi uwapeotsanishi niya, etyu emi kukitsityiatyishi.

14 She John gayisomeshitanishi hawe tyiwatseeku, tyaana; Tsekoma Parasai hano e hinome suwautyashikuya etyu kutrayisomeshitanishi tsatsi kuwautyashikuiyanu. Shrue Jesus tayitsakuiya: Naudyatrakunishi kuwataatsi itye ai shriena kaatatyishi nitruwatyashityusa? She etyu tsaashityi hawe nyeeshityusuku naudyatrakunishi yuku nyeeyutsiku, shrue menashru nutruwautyashi-kusa. Tsatsi hau hano natsi chananatsishi tsawini wakuni dyika ye naumashitanashakunu, she ai nu tsiupunaimishi, emi heya niunaottakumishi, wakuni

yuku si kayaokuiya, e shrue gotrotyishi tsi gaapesu.

17 E tsatsi hano natsi wino tsawini shipuna dyika nu tsisekuiyanatya, tsi shru tsi shipuna tsayukanu e wino wakaniku, e shipuna nayataaku. Etyu natsi wino natsi shipuna dyika nu tsisekuiyana, e shikaewa nyeeitragumu.

18 Tu na towaya shiya katsanishi, Mu! emi eyu huchani hawe tsutyu, e hau nu chaashutotruni tyanata: Sa-maku menashru kushityi; etyu hawe ima, e shramashityi niya pupakatsa, shrue si niiaaku. She Jesus dyu taaty hamashu tsutyu, e tsika gayisomeshitanishi. E mu! Katsi dyue tsitra kashraityi matsi tsiwatsimusu niya tyiwasa kuitsa yue kaatya hau tyiatsi, e ga-wakuni hau si dyu kaosityisishi tyiupakatsa; she naya si dyu e-chatsa, Tsi bato heme ga-wakuni tiupakatsaniku nitragu-si. Etyu Jesus hau si chaishigutra e tyiukacha, shrue taatsakuiya: Makutsa, shratsaani. Kutruhimatyishi niya shitragu. Shrue ai si yuku kui-tseshi chitragu. She Jesus huchani gaama hake kupuni e kuushipiurutsutyia e hano ganashiyani tsaapu kuwakachani, tyayitsakuiya: Peeshityuwanita; she makutsa tsatsi kushityishra, etyu tsiipai. She taamayanikuiyana. Etyu shrue hama hano chaatya ye tsiwatyikumetyi, hake si tyupu, e kamashityi si tyitya, shrue makutsa dyu tyiipatyu. E towa tsaanimasatyishi sai ai shra hatsi tsutyu.

27 Shrue Jesus ai yuku si tsutsi, dyue tsa-tsaakashityishi hamashu tyeeuyu tyiushigaitsanityu e tyaanakuiyasu: David ga-mutyi, kuutyuityikuiya. Shrue katrutya hawe kupuni, tsa-tsaakashityishi hawe tyeeuyu, e Jesus tyaaatsakuiya: Tutruuhima itye towa e-nitrasinishi? E taniaputyu; Ha, Huchani. Shrue gaa-ana tyiupakatsa, e tyaaatsakuiya: Kutruuhimatyishi niya emi taa e-truutraa. E gaa-ana taa-ata. E Jesus mame tsishatsi me e-tyaaatsakuiya: Bashru nutruu-kutruu tsa hau niutoni-kunishi. Etyu yuku si tseeyi sai ai shriena hatsi dyu tsaanimasatyishi tyiutonimishitratyu.

32 E wa emi hake si kumunishi, mu, tsa-katsanishi e

ganatyaya tsityatyishi hatrutsai hawe tauyutsemitta.

- 33 E ganatyaya tsaatyikumetyi, tsa-katsanishi tyamashra. Shrue tsi hanowishi imi ma tyiwautra, tyaana: Israel ga-hatsi dyu tsatsi hama taa tyiukachana. Etyu Parasai hano tyaana: Ganatyaya gaya-yani tseshi niya ganatyaya si kutyikusu.

- 35 Shrue Jesus ai shra tsichu tsaashityitra e drugasha taashityitra chaanitrutyaya e aiwatyami-gaya ye tayasomeshita, e Kaunamatsi itye-tshesha niya tawamani chukatsetasu, e sai tsawawasatyishi e hiyatsani tyuwatsaipunaisu. E tsi hanowishi kuwakachani amotyuwatrutsityishita, she gowa ma tayatra ni e sai chushramatsani, kanieru tsa hau gawaanishi me. Shrue gaumatsityaimishi ye tyayitsakuiya: Kaimatsi tsiwai tyani naoya tsa, etyu kowataniranishi hatsue tsaapu.
- 38 Tsiwai tyani yani tseshi dyika ye amoma pitrana, tsiwai tyani ye kowatanitra uiyatani.

10 Shrue katsi dyue tsitra ga-umatsityaimishi tyiwa-peotsa, itye tayiwa trani, sutsi maianishi ayawatyikusu e, sai tsi hiyatsani e sai tsi uwasatyi ayayatsaipunaimi.

- 2 She katsi dyue tsitra ga-umatsityaimishi taa E-gaya: Tsaya tseshi, Simon, Peter tsaniatyishi, e gatyumu Andrew; Zebedee ga-mutyi James a gatyumu John; Philip e Bartholomew; Thomas, e Matthew kaukitaukuiya; Alphaeus ga-mutyi James e Thaddaeus; 4 Canaan me Simon, e Judas Iscariot, emi tsika hau tsikuyanishi. Towa katsi dyue tsitra Jesus ai si shra tyayayata, e tyatyayinaika tyanata:

- Bashrumi nanami hano tseshi ga-hiyani ye wa tyekkuma, e bashrumi Samaria hano ga-tsaashityitra ye tyiepu, eku etyu Israel katrutya kayawanishi 6 kanieru dyika ye tyekkuma. E kutyekku iyatani nuwakatsetyia-kutrusa nutrana-kutrusa: Kaunamatsi 7 itye-tshesha hawe ena kaetyita. Shitawawasatyishi puwatsaipunawa, kaawishi si dyu niaputyume-kutrusa, leper tsiwawasatyishi niwakayawana-kutrusa, gana- 8 tyaya si niutyikuse-kutrusa. Ayaapi me shrayaou,

- 9 ayaapi me peyaou. Bami uru ku kasha-sawaka ku gayashityi-sawaka kutra-ushitani nu chuwaushityityi-tyia; e bami shika-ani niya ushitani ku dyue wakuni ku hashuimi ku uhashitani haku pityityia; she kutanitrani 11 dyika ga-upewi yatra tsa. E tsi haityi tsaashityitra, tsishu ku drusishu, hake tyeeponu, piyaipana-kutrusa ai dyu hau yatra tseshi e ai naata-kutrusa menashru ai 12 si yuku n'tyeeku-kutrusatyi. E katrutya kutyeeponu, 13 piminatya. E tsi we katrutya yatra tsanu, pinamata-wana; etyu tsi tsa yatra tsanu, kutra-uinamatyani si 14 chuwaitiyame. E tsi hau tsatsi kutruwashutsanu, e tsatsi kutra-mani kutruwakanu, tuwa katrutya e tuwa tsaashityitra hake kutyemu ni kutraya-ashityi nuwapa- 15 katsana-kutrusa. Kaimatsi shrayitsakuiya, Sodom ga-hatsi e Gomorrah ga-hatsi niya nyeetrutsityishitani- 16 kunishi hemaku tsatsi towa tsaashityitra niya nyeetru- tsityishitanikunu, ayatani tsaashityi-tratyuni. Mu, 17 shrayayata kanieru kakana tseemishra me ye. Shruwi kautsityishityiwanishi me e huuka tsatsi kautsayumishi me kutruwataa. Etyu hano bashru-trusa; she tsayawa- 18 tyamishra dyika hau niyayatana-kutruwatrumasa, e aiwatyami-gaya ye niyashayana-kutruwatrumasa. A, 19 Kaimatsi, dapopo e rai dyika ye su-tsi niya n'yetrutsee- kutruwatrumasa, emi heya wewa dyika e nanami hano 20 dyika, hinome nityiemitrana-tyumasa. She etyu dyu kutrayikuiyanatyi, bami chuwaushityityia tsi gowa ku tsi kui natrana-kutrusatyishi, she we ura nu niyaapi- 21 kutruwatrumasa tsi natrana-kutrusatyishi. She e- katsanishi wa tsatsi emi hishrome, etyu kutra-naishi- tyiashi ga-maianishi hishrome niya e-katsanishi tsa. 22 E ka-tyumu emi noyu ga-tyumu nyeotawa dyika hau nikuyaku, e naishityia tseshi noyu ga-iatra, e iatratyaimishi naishityia e naiatyaimishi dyika hau si nayaishi- 23 gutraikusa, shrue niyanakusa. E E-seshi su-tsi niya sai hano niwaiyani-kutruwatrumasa; etyu hautsi tsiinaottanishi hema kaushigitsanu nitraguku. She etyu towa tsaashityitra dyu hama kuwanyeyatyitrumasa n'traapayukutrusa, ishika dyika ye. She kaimatsi

shrayitsakuiya, tsa na Israel ga-tsaashityitra sai kutyeemuni menashru hano ga-mutyi hawe tsuniku.

24 Tsasomeshityia tsheshi tsatsi tayasomeshita yuku dinya tsanu, e kotanitra tsatsi yani tsheshi yuku dinya tsanu.

25 Tsi tsasomeshityia tsheshi tayasomeshita me n'takunu, e kotanitra yani tsheshi me n'takunu, washu tsa. Tsi katrutya yani tsheshi tsaniatya, Beelzebub, hatsushu

26 katrutya ai gaatruyishi taa nyeniatsiumasa. Emi heya bami kutrayiputsani, she tsi haityi tsiutyina-shityishi niutyinatyitwaniku, e tsi haityi tsiushikuma-shityishi niutonimiku. Tsi haityi shrawapenu, tsa-

27 mishityitsi dyika, mashra tshetra dyika nipenakutrusa, e tsi haityi kutrayappe dyika nu kutrakanitya, nuwakatsitya-kutrusa katrutya dinyi si dyu. E tsini kowawatruyiatyishi e tsatsi itye maiani nautakunu bashrumi putrayiputsanisha, she eku etyu shruwatya-

28 mutse dyika nu tsini e maiani shikaewa itye sutsi nitrakanishi putrayiputsani. Gao tsa dyue drugasha gayatanishi ishike sentawa shiya tyuyatani? E kutra-

29 naishityia tsatsi gatyumishi, tsatsi ishike puta nutsatya nu niutrachukunu. Etyu emi kutraya-nushika hadrani sai tsiuishityitani; emi heya bami chuputsanishi; mina

30 yuku kutrayatra, tsatsi hemaku naoya gayatanishi tsaaputya. Emi heya hau tsi hano dyika yani kaakai-

31 sunu, hinome niya, nutyumu sa-naishityia Kaunamatsi gaapishi dyika yani naakai-si. Etyu hau tsi hano dyika

32 yani kanatani, hinome tsatsi shityinimanu, nutyumu sa-naishityia Kaunamatsi gaapishi dyika yani tsatsi niunimatratyu-shikunu.

34 Bami chaatrutsityishityia tui hatsi dyu bishityi tsheshi tuwe utyi niya hawe tsuseshi; tsatsi bishityi tsheshi etyu

35 ishipari utyi niya hawe tsu-si. She hawe tsuseshi wa hatrutsai ga-naishityia dyika shruinisa, e makutsa ga-

36 naia dyika shruinisa, e biya ga-tsipiya dyika shruinisa neyatrassinishi niya. She hano tsiuyanishetyishi noyu

37 gaama si n'taapukusa. Hautsi ga-naishityia ku ga-naia-mina kuutsimunu, tsatsi hemaku shityiutsimunu, tsatsi hinome dyika yatra tsanu; e hautsi ga-mutyi ku ga-

maku mina kuutsimunu, tsatsi hemaku shityiutsimunu,

38 tsatsi hinome dyika yatra tsanu. E hautsi ga-shukucha-tsi tsatsi dyu kayakunishi hinome hamashu tsukunu,

39 tsatsi hinome dyika yatra tsanu. Hautsi ga-iani kauiyaanu, tu niutratsiuma; etyu hautsi ga-iani

40 su-tsi niya tu nitrakunu, emi niyainaku. Hautsi kutrushutsanu, tsika hinome shikushutsa; e hautsi hinome shikushutsanu, tsika kushutsa tuwe shikuku-

41 yanishi. Hautsi prophet E-gashi niya prophet kushutsanu, prophet ga-uyaani nyeeyaawanaku; e hautsi kuitonimishi hatrutsai kuitonimishi hatrutsai E-gashi

niya kushutsanu, kuitonimishi hatrutsai ga-uyaani nyeeyaawanaku. E hautsi umatsi E-gashi niya tsitsi

42 gawaishitaya tu ishike maka ishike towa iatratyaimishi gayashikatakunu, kaimatsi shrayitsakuiya mame tsatsi ga-uyaani tu niutratsiumanu.

11 She e-chaetra Jesus heme gayayanikuiyani katsi dyue tsitra ga-umatsityaimishi, ai si yuku tsutyu ga-tsaashityitrashi dyu ayasomeshitani e ukatsani.

2 Shruue John ayatsitani tyaachupi chaka Christo kutanitranshi, gayisomeshitanishi hake tyiyata, e

3 emi niya e-tyanata: Hishrome emi tyuta hawe tsunikunishi, ku ishika niyukai-tutrusa? E Jesus tayipeyuta

4 e tayitsakuiya: Hake tyeema e John pupena tsi kutraakanishi, e tsi shrukachanatyishi: tsa tsayaka-

5 shityishishi mashra si tsiwautra, kuwakusutsitanishi si tsekkuiya, leper tsiwawasatyishi tsiwakayawa, e pesh-

6 tsaaputyishi si ga-kani, e kaawishi si dyu tsayapatyunawa, e amome tsaaputyishi tawa-mani tsayawakatsanitta. E gauieetyi hautsi hinome niya tsatsi hama

anachupatsi tsityitanu.

7 Shruue towa ai si yuku tsekkuiya ni, Jesus, John niya tsi hanowishi dyika shru e-chatsa: Tsi haityi shrume-

kumenyee tsatdyau dyika ye hake kutyeeku? Achuwa

8 natrani niya tsiwitsiwukutsishi ta? Hatrutsai washratsi kowakunishi ta? Shrukunimasa washratsi kowakunishi

9 rai ga-ama ye ga-atru. She etyu tsekoma hake  
kutyekkuiya, prophet ukachani niya? Ha, shrayi-  
10 tsakuiya, mame mina prophet si yuku. Towa emi tsa he  
niya tsidyatranishi:

Mu, sa-upeseyitanishi kutruwawawi ai yuku  
yani nikuya-si, hewa kutra-hiyani hishrome ai  
yani haku nitraku.

11 Kaimatsi shrayitsakuiya, ku dyika tsiianishi kotaa,  
Baptisma John tseyatyinaimishi hatrutsai tsatsi hau  
kumunu; she etyu tu etse drutsishunishi Kaunamatsi  
12 itye-tshesha gaapishi John tsiyatyinaimi. She John  
gaapishi si yuku wai hema Kaunamatsi itye-tshesha  
tsipaputramuse, e tsipaputramusetyishi kauyaanase.  
13 She sai tsi prophets e utsitokaishi John gaapishi hema  
tayasomeshita. E tsi noyu e kutrusatyi shrauiyaani-  
14 setya, towa hawe tsunikunishi Elijah. Hautsi akani  
tsipetyishra, peka. She etyu wai hano tsi haityi  
15 kushigayu niyatra-si? Emi hawe tsishityiatyishishra  
ye tseemishi e mika gowapeotsatyiatanishi iatra me;  
16 wa tyanatasu: Shraiwashipiurutsanitta, e tsatsi shratse-  
tyiatya; shratanatyi, e tsatsi si ayama-kutrusatyi.  
17 She emi John tsutyu e tsatsi chupbeokuiya e tsatsi  
18 tyushikatyi-kuiyanu, shrue e tyatsia: Chanatyaya. Etyu  
19 hano ga-mutyi hawe tsutyu kupbeokuiyani e kushikatyi-  
kuiyani, shrue tyatsia: Mu, kaotani hatrutsai e wino  
kushikatyikuiya, kaukitaukuiyana e kokitsityia gaiwa-  
kini. Shrami utonimi tsiukachanishi gaitani niya tsi-  
tyiemi-tyita.

20 Shrue shra tsaashityitra, ai hawe nu mina yuku  
imi ma ishatsini e-chaetra, shrue shru kuwauishikuiya  
ni tyuwanamatsita, she tsatsi chuwawataipunaimetya:  
21 Eiya kuta, Chorazin! Eiya kuta, Bethsaida! She tsi  
hishrome we nu shaashityitranishi e-chaetranishi imi  
ma ishatsini Tyre e Sidon ai dyu tsitanitranishra, mame  
mishru hama haikani wakuni e mishai niya kowawatai-  
22 punaime. She etyu shrayitsakuiya, ayatani tsaashityi-  
tratryuni hishrome hemaku tsatsi Tyre e Sidon dyika  
23 gayutaya nyeetranikunu. E trutyu Capernaum shaa-

shityitra, kowatyuma hemaku dinyaa nyeeitranatyu?  
Tsa, sai si nu nyeeityatsinaime-shru, she tsi Sodom  
dyika dyu hishrome dyika dyu hemaku imi ma ishatsini  
e-kaetranatyunu, emi wai menashru nyeeshtyitiraku.  
24 Etyu shrayitsakuiya, ayatani tsaashityi-tratryuni,  
hishrome hemaku tsatsi Sodom ga-hatsi dyika  
gayutaya nyeetranikunu.

25 Emi eyu Jesus tyayipeyutawa e chatsa: Naishityia,  
Kaunamatsi e gaishibishra dyu Huchani kutyeshi,  
shraunamatyi sai tsi towa kuwasu e kutonimasatyishi  
shruwawakucha, e owaka dyika tyiemi shraiwaatrani.  
26 Ha, Naishityia, she emi taa mame anye-shru.  
27 Sai tsi sa-naishityia si shikaou; e tsatsi hau kunima  
Umutyi, she nowe Naishityia, e tsatsi hau kunima  
Naishityia, she nowe Umutyi e hau tsi dyika ye Umutyi  
28 e-kunu mashra nitrakunu. Sai shruwatanitranishi e  
kutruwagayutaya tuwe tyekkuma, e nyeyauanatra-  
29 shrawatruma. Sa-yaiyuishityi chuwatyityinami e  
chuwatyumitra, hinome si, she shrana suta, e se-  
winoshika dyika amoma suta; shrue kutraya-maiani  
30 dyika uanatrani niyainawa-kutrusa. She sa-yai-  
tyuishityi tsatsi kaosayu, e sa-uipatyuiyani shapa tsi.

12 Emi eyue, uanatrani tsaashika tse Jesus tsaishra  
ye tyiupusu; E gaisomeshitanishi tyayitramashito,  
2 shrue ashvani chuwawaiytyityia e tyaape. She Parasai  
hano towa kukachanatyi tania: Mu, kutraisomeshita-  
nishi e-tsitrantatyishi wa emi e uanatrani tsaashityi e-  
3 utrani tsatsi shrami tsanu. She etyu tyayitsakuiya:  
Tsatsi tsidyatranani trukachana, tsi kui tsitrantishi  
4 David, tsiyamashityi, e hawe kaiwatyisetyishi, gowa  
Iusi katrutya ye kupunishi e tsiyaiyanishi semita  
kupbe; etyu towa kupbewi tsatsi itye tanu, ku kai-  
5 watyisetyishi, etyu nowe tutatsityitra. Ku utsitokai  
tsatsi na trukachana, gowa uanatrani tsaashityi tsi-  
6 tyumi-katrutya gaya tutatsityitra uanatrani tsaashika  
kukitsityiatyisu, e tsatsi tsiwatsikunu? She e-shrayitsa-  
kuiya, tsityumi-katrutya yuku tseyatyinaimishi tui gaa.

- 7 Etyu tsi shrunonimasatyanu tsi towa mani tsheshi, Ayatyuiti shikutsipu, e tsatsi uyaityani, tsa-kokitsanatyishi gai tsatsi kukitsi-nyiwatayaina-kutrusatyanu.
- 8 She hano ga-mutyi uanatrani tsaashika dyika dyu huchani tsa.
- 9 Shrue ai si yuku tsutsi gaya-aiwatyami-gaya ye tyiupu. She Mu, ishikaya kamashityi sai tyeapanawani hatrutsai ai tya. E shrue tyiupetawa, tyanata: Uanatrani tsaashityi itye ta ayatsaipunaimi? heya niyewaitawanatyu. She e-tyaityakuiya: Haityi hau ye emi tsi ishike kanieru gatyashra, e tsi chitye uanatrani tsaashityi gotrotyishra nu kutrachanu, tsatsi e-nityatyu e si dyu niukutyu? Hatsumaku hano kanieru dyika mina yuku yatra tsa! Emi heya itye e-tsa uanatrani tsaashityi tsi tawa utyitani. Shrue hatrutsai e-tatsakuiya: Shramashityi hau chuta! Shrue hau chauta, she ishika kamashityi me si heka tyiutra. Shrue Parasai hano hake si yeemu chawiwatyami, kutsi niya, gowa niyumutyitsana-tsiumasatyishi.
- 15 She etyu Jesus kaotyumi, ai si yuku tsutyu, e mame tsi hanowishi hamashu shichakuiya, e emi sai tyiwatsaipunai, e shrami tyayayanikuiya tsatsi tsi tyiemi nitratsiumasatyishi, emi heya prophet tsheshi Isaiah e-katsanishi e-naitraku, tyanata:
- 18 Mu, Sa-tanitrani, sa-utatawi si-utsumunishi, se-winoshika niya anye shikuushranishi, Satsatsi ai dyu nityi-si, shrue tsiuitawanishi niya tawa-mani nanami hano dyika ye naupeseku.
- 19 Wa tsatsi neyayetsanikunu, e tsatsi niusheet-sitakunu, e tsatsi hautsi hano ga-tsanishi hiyani ye nikakunu. Tsiunatyumenishi trukawa tsatsi naokayutsakunu, e korarakanishi flax kiwa-tsheshi tsatsi e-nyenoshitoty, menashru ai shra tsiuitawanishi tsiyatani ushiawishi hemaku dyika; e E-gashi niya nanami hano nutrayeetsishikusa.
- 22 Shrue ganatyaya tsityatyishi, tsatsi tyikashityi e tsatsi katanu tauyutsemitta, e si tyiutsaipunawa, hemaku tsatsi katanishi si chatsa e si tyikashityi.

- 23 She sai hano chaaputsa e tyana: Tsa towa David gamutyi ta? She etyu Parasai hano kakanityi tyana: Towa hatrutsai tsatsi ganatyaya kutyikusu, tu heme ganatyaya ga-huchani Beelzebub niya. She Jesus gaatsityishityiatyishi kutoni, tayitsakuiya: Sai heme itye-tshesra kuwayakuicha e kayayetsanishratya sai tu naitraku; e sai tsaashityitra e katrutya kuwayakuicha tsatsi itye nichanikunu. E tsika tsi shruwatyamu kutyikunu shruwatyamu noyu kaokuicha, shrue gowa ga-itye-tshesra itye nichaniku? She tsi hinome Beelzebub niya ganatyaya si-utyikusu, hautsi niya kutra-iatratyaimishi kutyikuse? Emi heya hewa niwatana-kutruwatrumasa. She etyu tsi hinome Iusi ga-maianishi dyia ganatyaya si-utyikusu, menashru Iusi ga-itye-tshesra hau shaatsi. Kume etyu gowa tsishatsishi hatrutsai gaama hau tuwe itye niupuku, e gaishimishi sutsi niutraku, tsi tsa tsaya tsishatsishi hatrutsai tsiupashityanitty, e shrue menashru gaama sutsi nitraku. Hautsi tsatsi su-tyisityuka, wewisa tsa; e hautsi tsatsi hinome dyika tsiwatyasunu kushramatsita. Emi heya shrayitsakuiya, sai ukitsishi e sai sutsime atsani, hano dyika nyeyawataipunaimiku, she etyu Kukimuni Maiani dyika sutsime atsani tsatsi nyeyawataipunaimikunu. E hautsi hano ga-mutyi dyika sutsime katanu nyewataipunaimiku, etyu hautsi Kukimuni Maiani dyika sutsime katanu, tsatsi nyewataipunaimikunu, tsatsi tui gaishibishra dyu ku tsatsi ishika gaishibishra dyu. Haityi-puta kiwa tsishi tawa pitrana e ga-hitrani tawa pitrana, ku kiwa tsishi sutsi pitrana e ga-hitrani sutsi pitrana. She kiwa tsishi ga-hitrani niya tsaitrunimi. Shruwi ga-iatratyaimishi! Sutsi kutaapu, gowa itye tawa atsani kutratsia? She winoshika kumunishi dyika si tsuika katsasu. Tawa hatrutsai tawa tsityumishi dyika si tawa tsheshi hawe tsitra; e sutsi hatrutsai sutsi tsityumishi dyika si sutsi tsheshi hawe tsitra. She e-shrayitsakuiya, hano natratsia-kusatyishi sai tume utsetyitani dyika, ayatani tsaashityi-tratryuni tyiemi nitrana-kusa. She

kutra-tseni niya tawa nyeeyainawa-shru, e kutra-tseni niya sutsi nyeeyainawa-shru.

38 Shrue haityi tsidyatranikusana e Parasai hano tyapeyutawani tyana: Tsayosomeeshita, Hishrome dyika si utyiemi-trani ukachani shikuwatsipu. She tyapeyutawa tyayitsakuiya: Sutsime e tuwe gaya-uaitya kaatonimishi utyiemi-trani tsiyaipatyikuiyana, etyu tsatsi tsi ishika utyiemi-trani nyeyaapiku, tu heme prophet tseshi Jonah ga-utyiemi-trani. She Jonah chami sai e chami bishu shikaashi kunacha gaachu, emi taa hano ga-mutyi chami sai e chami bishu hatsi ga-winoshika nichuku. Ninevah-me hatrutsai, ayatani tsaashityi-tratyuni, towa kaatonimishi kowataatsi dyu nutraashratyi-kusa, e sutsi nyeeyainawa-kusa; she Jonah kokatsetanishi dyika kowataipunaim; e Mu, mame Jonah tseyatynimi tui ga. Wa ai ku-me kuitsa-huchani, ayatani tsaashityi-tratyuni kaatonimishi kotaa-tse dyu nitatyiku e sutsi niyainaku, she wa tiye tshesha si tsutyu, Solomon ga-somenishi nikakunishi niya; etyu Mu, mame Solomon tseyatynimi tui ga.

43 She etyu hama adyema tseshi maiani hano dyika si kumuni tsiipanishra dyika ye gaanitrutyaya, uanatrani tsiyaipatyikuiya e tsatsi tsiyainaukuiya. Shrue e-katsa: Sa-ama ye hake si tsunisi, ai si si-umunishra, e hau si tsaatsini tsiyainaukuiya tu tsa, tsayashikani e tsiushityemi tsi. Shrue hake si tsutyuni maityana maiani, mina mame sutsime tsaputyishi tyayatrutse, e hau tseepuni ai gaatru, shrue he hatrutsai, chai me, mameshru sutsi tyitrani. Emi taa tsika towa sutsi kaatonimishi n'taapukusa.

46 Mi na tsi hanowi gayiminatyikuiyani, Mu, ga-naia e ga-tyumutyaimishi wa ai chaatya si tyeechanishi, tyiwatsipu minatakusatyishi. She hawe taatsakuiya: Mu, kutra-naia e kutra-tyumutyaimishi wa ai chaatya si tseechanishi, tsiwatsipu nyiminata-kutrumasatyishi.

48 She etyu tyipeyuta, tsiupenishi taatsakuiya: Hau sa-naia? e hau sa-tyumutyai? Shrue kamashityi chaotta gaisomeshitanishi dyika ye wa, e e-chatsa: Mu, Sa-naia

50 e sa-tyumutyaimishi! She hautsi sa-naishityia Kaunamatsi gaapishi ga-uwayani e-tsitranu, emi wa sa-tyumu e sa-kuitra e sa-naia tsa.

13 Emi eyu tsaashityi Jesus katrutya ai si kumuni kuta-butru ai si chukuiya. E mame tsi hanowishi ai shriena chawiyatya, shrue kanue dyu tyiupu e ai si nu chukuiya, e sai tsi hanowishi hatsi si dyu tyeechanishi.

3 E shrue uwasenishi niya naoya tsi tyiwape, tyanata:

4 Mu, Kautyisu kautyime; shrue kautyimi, hiyani ye nu hatsue chuwisha; shrue gayatanishi hawe tyeeuku e tyaafe. Mika, yaoni tshesha dyika ye dyu chuwisha; e tsa ai dyu naoya yaai tshesha, shrue shru dyu tyiemu, she tsatsi yaai chaapichu. Shrue hawe dyu oshratra kumuni, tayashitamuchatsa e sai tayapanito, she tsatsi tyawawaitranishitya. E mika, haika naaishu ye nu petya; shrue haika dyu tyeeemu, e haika dinya tyiwacha.

8 Etyu mika, tawa hatsi dyika ye nu chuwisha; shrue towa hitrani chaetra, hatsue katsi-wa-katsi yuku, mika shichisu-wa-katsi yuku, e mika chamiya-katsi yuku.

9 Hautsi akani tsiipetyishra, peka.

10 She umatsityaimishi hawe tyeeuku e tania: Tsekoma uwaseni niya shrayaminatyikuiya? E tyapeyuta e tyayitsakuiya: She kutra-ayaapi utonimi Kaunamatsi itye-tshesha tsi gowa tsiushikumashityishi, etyu tsatsi we ye tsayaapityani. She hautsi gaashra, niyeepiku, shrue mame naoya naku; etyu hautsi tsa gaashranu, bato tsi chaashra, si nyesatyutsitsaomasa. Emi heya uwaseni niya seyiminatyikuiya; she bato kuukachanatyani, tsatsi kuukachanatyani, e bato kakanatyani, tsatsi kakanatyani ku tsatsi kuwittawityiatyanu. E emi niya prophet tseshi Isaiah e-katsanishi weya hano e-kaetra. Tyanata:

15 Akani niya nutrakase-kutrusa e tsatsi niwittawana-kutrusatya; e ukachani niya niukachase-kutrusa, e tsatsi mashra nuwaotra-kutruwatru-manu. She towa hano gaya-winoshika gayayu, e tsayappe pesha me tsa, e gaya-ana tsechaini-

tyishi, tsi shru tsi gaya-ana niya niukachana-kusatyishi, e tsayappe niya nitrakani-kusatyishi, e gaya-winoshika niya niwittawana-kusatyishi, shrue si kayaishigutra e shrami niyatra-si.

16 Etyu gauyeetyishi kutraya-ana, she kuukachanikuiya,  
17 e kutrayappe she gakase. She kaimatsi shrayitsakuiya, naoya prophets e kuwautonimishi tsi shruukachanatyishi tsiwatsipu ukachani, etyu tsatsi kuukachanatyia; e tsi kutra-kanytyishi tsiwatsipu akani, etyu tsatsi gakanyetya.

18 Shrue, trakani kautyisu niya uwaseni. Kaunamatsi  
19 itye-tshesha dyika mani hautsi gakanu, e tsatsi kuwittawanu, sutsime tsheshi hau tsuku, shrue ga-winoshika naya tsiutyimishi tsiusatyutsa. Towa emi tsa, hiyani ishikayashu dyika ye tsiutyimishi. E yaoni-tshesha dyika ye dyu tsiutyimishi, emi tsa, mani gakashi e tu haikamiku tsiuishityia ni kayaokuiya, etyu nouy tsatsi ga-wawaitranishra, she etyu mina hatsuma kaushigitsa, shrue towa mani kutsi niya tsaayatsitsinaimetyanu ku tsaaityiyiatyanu, tu haikamiku tsiupakutsani. E haika naaishu ye nu tsiutyimishi, emi towa mani gaku, etyu tsaashityama ga-utsityishitanishi e tseyatyimi-ashe gawitutranihi mani kuwakutaya e shrue emi tsatsi hitrani tsiutrano. Etyu tawa hatsi dyika ye tsiutyimishi, emi towa mani gaku e kuwittawita; kaimatsi emi hitrani e tsiutra e tsiyakamisu, hatsue katsi-wa-katsi yuku, mika shichisu-wa-katsi yuku, e mika chamiya-katsi yuku.

24 Tsika na uwaseni hawe tyaiwatrani tyanata: Kaunamatsi itye-tshesha tsa, hatrutsai ga-hatsi dyika  
25 ye tawa kawitsi tsiutyimishi kushigayu. Etyu hano tseepaityi, tsiuyetsanishi hawe tsutyu e ashрани dyika  
26 ye hiuyupu chaulyi, e shrue yuku si tsutyu. E shrue shru, ashрани kiwa tsheshi hawe dyu tsemuni e hitrani  
27 kaetrani, hiuyupu tsika tyiemi chaetra. Shrue yani tsheshi ga-tanitranyaimishi hawe tyeeku, tania: Yani tsheshi, Tsatsi tawa kawitsi kutraishra traulyi? Shrue  
28 hatyi si hiuyupu tseeku? She tyayitsakuiya: Tsayaye-

tsanishi hano towa e-tyitra. Shrue ga-tanitranyai-mishi tania: Kume e-tru towa nyeyatawa-sutrusatyishi?  
29 Etyu e-chatsa: Tsa, Tsi shru tsi hiuyupu dyu shruwanutsanatyi, ashрани gayatsi dyu niwanutsana-kutrusa.

30 Pawaheetsani shikaewa uitonimi uwaityani kaetrani hama, she uwaityani tsaashityi, kowawaityitia niye-tsakuiya-si hiuyupu tsaya payatawa e pipatyame niutakaniku ni; etyu ashрани sa-ushitani ye niushitanakutrusa.

31 Tsika ishika uwaseni hawe tyaiwatrani tyanata: Kaunamatsi itye-tshesha waku kawitsi kushigayu. Towa kawitsi hano tsitawi ga-hatsi dyu kaautyima.  
32 Kaimatsi kawitsi kotaa tse, towa mame yuku drusishu, she etyu shru kitonimi, mame mina yuku tsiisichu kiwa kaetyita, hemaku howaka dyika ye gayatanishi hawe tsekkuyata gatsashityuma ye dyu kaatyita.

33 Tsika ishika uwaseni tyiwappe: Kaunamatsi itye-tshesha kashratyi kushigayu. Emi towa hau ku chami tsiuityimi inawi dyika nu tyuishikumasha menashru sai kashratyitratyini.

34 Sai tsi towa Jesus tsi hanowishi dyika uwaseni niya gayimina; etyu tsi tsa uwaseni niyaka tsatsi tyayiminyakuiya, emi e-naitrakunishi prophet e-katsanishi niyaka tyanata:

Siika nieta-si, uwaseni niya nyemashra-si tsi tsiuishikumashityishi tsaya hama tse si yuku.

36 E shrue tu tyayatra tsi hanowishi, e katrutya ye tyupu, kaumatsiyaimishi hawe tyeeku tyaana: Tyiemi gayiawatrani tsaishra ye hiuyupu uwaseni. Shrue tyaipeyuta e-chatsa: Tawa kawitsi kautyisu, hano gamutyi tsa; e tsaishra, gaishibishra tsa; e tawa kawitsi, emi wa Kaunamatsi itye-tshesha ga-iatrai; e hiuyupu, emi wa sutsime tsheshi ga-iatratyia; e kautyimishi tsayayetsanishi, emi wa shruwatyamu tsa; e uwaityani kaetranihi gaishibishra kuinaottani tsa; e kowawaityityia, emi Iusi ga-upeseyityaimishi tsaapu. Emi taa hiuyupu dyu tsiukuiyawishi e tsipashi niya tsiutakani,  
41 emi taa n'tyeeku gaishibishra kuinaottani. Hano ga-



mutyi ga-upseyityaimishi neyayataku, e ga-itye-  
 42 tseshra si sai tsi ayapakashityi e sutsime tsityitanatyishi  
 nyiwatyamekusa, e tsipashishra ye nu niyakuiyawiku,  
 43 emi ai niyetyikuiyaniku e hachani nyeyiushikunutsita-  
 niku. Emi shrue shrami tsaaputyishi oshratra me ga-  
 naishityiashi ga-itye-tseshra dyika nowashityemitsita-  
 kusa. Hautsi akani tsipetyishra, peka.

44 Kaunamatsi itye-tseshra tsaishra dyika ye tsiushi-  
 kumashityishi tsityumi tsheshi ma tse. Towa, hatrutsai  
 tsiyainawi tsiushikumashityi, shrue tsiuishityiani tsuku  
 e shrue sai tsi gaishi tsisha, shrue emi tsaishra tynatta.

45 E tsika na, Kaunamatsi itye-tseshra tsityumi apuna  
 46 kowatyaipatyikuiya tsishita kushigayu. Towa, ishike  
 naoya kayamishi apuna tsiyainaku tsuku, e shrue sai  
 tsi gaishi tsisha e towa tsinatta.

47 Tsika na, Kaunamatsi itye-tseshra, shikaashi-  
 uwani kunapatyishi kutaa dyika nu tsaawishi, e shrue  
 48 sai kuishitye shrama tsiuwatyamishi kushigayu. Towa  
 guta ni kutaa-butru hau dyu nutsana, e ai si nu chaata,  
 shrue tawa tsheshi dyuni dyika nu tyiwatyami, etyu  
 49 sutsi tsheshi tyaokuiyawii. Emi taa gaishibishra kui-  
 naottani n'taku. Kaunamatsi ga-upeseityaimishi  
 hawe nityeekusa, shrue sutsi tsheshi tawa tsheshi naaishu  
 50 si nyeyatawikusa; e shrue tsipashrumishra ye nu  
 niyakuiyawikusa, emi ai niyetyikuiyaniku e hachani  
 nyeyiushikunutsitaniku.

51 Sai tsi towa truwawittawana? E tania: Ha.  
 52 Shrue tyayitsakuiya: Emi heya sai tsidyatranikusu,  
 Kaunamatsi itye-tseshra niya tsi e-tsaitranatyanu,  
 katrutya yani tsheshi kushigayu. Towa tsityumishi  
 gashi natsi tsheshi e tsawini tsheshi hawe n'tyekkuiya.

53 Shrue emi e-chaetra, Jesus towa uwaseni kaunao-  
 54 ttani, ai yuku si tsutyu. E shrue ai hatsi tsiianishra hau  
 si taatsi, e gaya-ai watyami-gaya ye tyayisomeshita, emi  
 heya chaaputsa e tyaana: Hatyi si towa hatrutsai towa  
 55 utonimi e towa imi ma ishatsini kayaou? Kume tsa  
 towa kaatraya cha-mutyi? Kume tsa ga-naia Mary  
 tania? E ga-tyumutyaimishi James e Joseph e Simon

56 e Judas? E ga-kuitratyaimishi, wa gao tsa sai tuwe  
 tyeeekuiya? kume shrue hatyi si towa hatrutsai towa sai  
 57 tsi kayaou? E chuwatnatyumena etyu Jesus tyayitsa-  
 kuiya: Tsi tsa noyu hatsi e noyu gaama dyika tsanu  
 58 prophet tsheshi tsatsi tsi tsatsi tsaumasatyanu. E shrue  
 tsatsi naoya imi ma ishatsini ai e-tsitrano, she tsatsi  
 tsiwahimatyishi niya.

14 Emi eyu tsaashityi Herod dapopo, Jesus  
 2 niya upetani chaka, e shrue gautanitranyaimishi  
 tayitsakuiya: Towa emi Baptisuma John tsa. Wa  
 ushitoni si dyu tyipatyu, she emi towaya towa imi  
 3 ma ishatsini gautseshruwa. She Herod John tyitya, e  
 tyiupashityani, e utsitani tyipunaii, ga-tyumu Philip  
 4 ga-okui Herodias kutsi niya. She John e taatsakuiya:  
 5 Tsatsi itye naokui-shrunu. She etyu John naotakuni, tsi  
 hanowishi tyiputsana, she John prophet me taayukaii.  
 6 Etyu shrue shru Herod tsiianishi tsiutsaashityishi  
 kaetra ni, Herodias ga-maku ai suna nu chitseta, e  
 7 shrue Herod tyiuanuyutsa, e emi heya kaimatsi akaesu  
 niya tyiushrani tsi haityi kuwitaanishi niyuuanityuma.  
 8 E mishru ga-naia tyiyanikuiyani, shrue chuwitaa  
 tyanata: Tuwe tui waishitani si dyu Baptisuma John  
 9 ga-nushika kutyi. E rai tsheshi tsityishityityu, she etyu  
 kaimatsi ka-akaesunishi niya, e ai haupa kauyatawa-  
 10 tyishi kuwatrutsi niya, chuwaya utyityi. E hake tyaya-  
 yata e John ai ayatsitani dyika tyunushigaitwana;  
 11 shrue ga-nushika waishitani si dyu gaapi hawe taayu-  
 tsee e maku tsheshi taatyita. Shrue ga-naia dyika ye  
 12 tyiyutse. She ga-umatsityaimishi hawe tyeeuku e shumu  
 dyu kayaawatya, e tyityaitsime, e shrue hake tyeeuku  
 Jesus tyupena.

13 She Jesus kakani, kanue niya ai si yuku tsutyu, tu  
 tseshra ye. E tsi hanowishi kakanaty, tseekuiyani  
 14 hamashu tyeeuku, tsaashityitranishi si. E Jesus hawe  
 tsutyu e mame tsi hanowishi tyiwakacha, e amo-  
 tyiwaatrutsityishita, shrue ga-tsiwawasatyishi tyuwa-  
 15 tsaipunaii. Shrue shapuka ni kaetrani, ga-umatsityai-

mishi hawe tyeeku tyaana: Tui tu tshesha tsa, e tsiiami; tsi hanowishi yuku si payitrawa tsaashityitra ye si n'tyeekukusatyi upbewi n'tranatanakusatyi. Etyu Jesus tyayitsakuiya: Tsatsi sekka n'tyeekukusatya; payatyishana. Shrue tania: Tu heme taama semita e dyue shikaashi tui sutraishimi. She e-chatsa: Tuwe kuiyashemitta. Shrue tsi hanowishi mushru dyika si nu ukuiyani tyayayanikuiya, shrue taama semita e dyue shikaashi chuiyatyaya, e kowatyuma ye dyu tyauyukai semita tsityu-tyayatra, shrue chautsayutsa e ga-umatsityaimishi tyayawayatyi, shrue ga-umatsityaimishi tsi hanowishi dyika ye tyaiwayatyita. She sai haupa tyaape, e chatrukaii; shrue kaatyumishi tsaayutseshi dyu chuwatana, katsi dyue tsitra kanashitu gutana. E towa tyaapbetyishi haiytyisi taama miri hatrutsai, e hau yuwi kuiyawitra e iatra.

Shrue tu haikamiku Jesus ga-umatsityaimishi tiwakashitaya kanue dyu uyupuni e yuku yani wewisa ye wa utsutsi, menashru noyu tsi hanowishi ai yuku si gaitrawani. She tsi hanowishi ai si yuku gaitrawani, shrue menashru kotyu ye dyu nowe tsutyu, amoma tyitra ni, e shapuka ni e-kaetrani, nowe ai tya. Etyu kanue shrue shru tsitsi dyika suna ai tya, kuwaidashikatsita niya ganashiyani e-tayatyita, she hakuma wa natrani tyeeshitaya. E ha niya shamuka ni, Jesus tsitsi dyika dyu chaanitrutyaya hawe tyiwa-tsuku. E kaumatsityaimishi tsitsi dyika dyu ga-ani tsiukachanaty, chaaputsa tyaana: Wa ganatyaya tsa. E kaaputsityiatyi tyaata. Etyu tu haikamiku Jesus tyayimina tyanata: Truwauishityiani; tu hinome suta; bami traiwatyushu. Shrue Peter tyipeyuta taatsakuiya: Huchani, Tsi emi kutanu, tsitsi dyika dyu hishrome dyika hau utsutsi kuppeotsa. She e-chatsa: Hawe ima. She Peter kanue si nu tyitya, e Jesus ye utsutsi niya tsitsi dyika dyu chaanitrutyaya. She etyu natrani kuukachani tyiutyushu nitratyu, shrue shru nuka tyupusu ni tyiushigaitsa tyanata: Huchani, Kuitragu. E tu haikamiku Jesus kamashityi niya hau chaotta e

tyitya e taatsakuiya: Koimi uhimatyi kuta! Tsekoma tsa kutruhimaty? Shrue kanue si dyu gaapuni natrani chutyatsi. Shrue kanue dyika dyu tseeputyishi chaashitotrumi tyanata: Kaimatsi Iusi ga-mutyi kuta.

E shrue tsitsi kowauchapuni, Gennesaret hatsi tshesha hau tyeetyu. E ai tseemishi hatrutsai tsiwitawanaty, sai ai shriena tyiyatana, e sai tsiwawasatyishi hau tawatrutsemitta. E tyiuitanakuiyana tu heme etse ga-wakuni hau si dyu kaosityitsishi niupakatsanakusatyishi, she sai heme tsiupakatsanatyishi sai si tawa tayatra.

15 She Jerusalem si Parasai hano e tsidyatranikusana Jesus dyika hau tyeeku tyaana: Tsi haiytyi niya shraisomeshitanishi tsaya tsaaputyishi hama tse si tsayukaityishi tu tyitrana? She semita gaapbenaty tsatsi kamawaishityisetya. Shrue tyayipeyuta tyanata: Tsi haiytyi shi niya trutyumu kutra-tsayukaityishi niya Iusi ga-uwayani tu shitrana? She Iusi kanata,

Tsityumi paaira kutra-naishityia e kutra-naia; e tsika, Hautsi ga-naishityia e ga-naia dyika sutsime e-katsanu, piushito.

She etyu e-kutratsiatyeta, Hautsi ga-naishityia ku ganaia e-tsatsakuiya, Tsi sashi niutyawa-kutrumanishi mishru tsayaapini, tsatsi sekka ga-naishityia ku ganaia tsityu-nutranikunu. Shrue Iusi ga-uwayani tu shitrana, kutra-tsayukaityishi niya. Gayauitutyityia kutaaputyishi, Shrami Isaiah shratrutsi niya e-chatsa, tyanata:

Towa hano tsaya-ka niya tsityu-shikuityityia etyu gaya-winoshika hinome dyika yuku tiye ee-tsaapu. Etyu shikutyumityitrawanatyikuiyatyishi tuma tsa, hano ga-uyukaityishi uwayanishi niya gayasomeshityiata.

Shrue tsi hanowishi tiwapeotsa e tyayitsakuiya: Tra-kani e puitawana, Tsatsi tsiika ye nu kupunishi hano tsatsi chitye e-tsitrano, etyu tsiika si kumunishi, towa hano tsatsi chitye tsityiya. Shrue ga-umatsityaimishi hawe tyeeku tania: Towa shratsanishi Parasai hano

- 13 kakanaty tsiwanatyumeni traottyi? Etyu tyaipeyuta tyanata: Sai heme tsiutyimi, tsi kaunamatsi gaapishi sa-naishityia tsatsi kautyinu, si dyu niusityaniku.
- 14 Tu payatrana. Tsatsi tsayakashityishra gayatrutseyatani tsaapu. E tsi tsa-tsikashityishi tsa-tsikashityishi tsishityiyakunu, gotrotyishra nu ishikawa n'trautrachakuu. She Peter tyipeyuta tyanata: Towa uwaseni tyiemi gaiwatrani. She Jesus e-tyayitsakuiya: Gao trutyumu tsatsi na truwittawanatya? Tsatsi na tyiemi trutruwautra, tsi haiytyisi tsiiika ye nu kupunishi kunacha ye nu kupusu, e shrue uishityupeyi ye nu tsatyitruui? She etyu haiytyisi tsiiika si tseemunishi winoshika dyika si tseemusu. Towa hano tsa chitye tsayatyita. She winoshika si dyu hawe tseemusu adyema utsityishitani, ayawani, ayauiani, adyema e-utrani, uchawani, tsa kaimatsi shityishityiku utyitani, sutsime utsetatyii; sai tsi towa hano tsa chitye tsayatyita, etyu tsatsi kaamawashityimi kupbenishi, tsatsi towaya hano tsa chitye e-tsiutyitanu.
- 21 She Jesus ai si yuku chutata, Tyre e Sidon ai shriona gaa-hatsi ye tsutyu. E Mu, Kana-me ku, towa hatsi dyika si tyumu chaatyikuiya tyanatani: Kutuyiitui-kuiya, Huchani, David ga-mutyi; sa-maku kaosa me ganatyaya tsityatyi. Etyu tsatsi tyipeyuta, tsatsi ishike mani puta. E ga-umatsityaimishi hawe tyeeuku, naisheetsi tyiwittaana tania: Yuku piawa, she hamashu shikuwa-kaatyikuiya. Etyu tyaipeyuta tyayitsakuiya: Tsi tsa Israel ga-kanieru tsaitrawani niya tsatsi shityaakuiyanatya. Shrue emi kui-tseshi hawe tsutyu, hau chaashitotru si tyanatasu: Huchani, kumatsani.
- 26 Shrue tyipeyuta e chatsa: Iatra ga-semitashi utawi e diya hau utyityi tsatsi shrami tsanu. Etyu tyipeyuta, Kaimatsi, Huchani. She etyu diya kupbeokuiya shikutruna tsidyashi ga-mesa dyika yuku nu pekanishi.
- 28 Shrue Jesus tyipeyuta taatsakuiya: A, Ku, kutra-uhimatyi mame tsishatsi; emi kutru-tsiputyishi e-putrutra ni. Shrue ga-maku ai ura si yuku sai si tyiutsaipu.

- 29 She Jesus ai yuku si tsutyu, e Galilee kutaashi butru haweku hau taatsi, e kotyu ye dyu tsutyu e ai si chukuiya. E mame tsi hanowishi hawe shichaku, e hawe tyayitrutseyana tsa itye tsekkuiyanishi, tsa tsayakashityishi, tsa katsiatyishi, kowakusutsitanishi, e naoya mika, e Jesus gaapishra ai si nu tyiatana, she si tyuwatsaipunaii. Emi heyta tsi hanowishi imi ma tayatra, kuwakachanatyi tsa katsiatyishi si katsiatyi, e kowakusutsitanishi si tawa tsayatrani, e tsa itye tsekkuiyanishi si tsekkuiyani, e tsa tsayakashityishi si tsayakashityitratyia, shrue Israel ga-Iusi tyiuamashityia.
- 32 She Jesus ga-umatsityaimishi hau si tyiwapectsa, tyanata: Towa tsi hanowishi amo-siwatyuityikuiya, she shru chami sai saiwatyise e tsatsi tsi kaupbewishitya, e kuwashruikanishi tsatsi tuwe yuku si nieitrawashikunu, tsi shru tsi hiyani dyika ye kowayushityemivanu. Shrue ga-umatsityaimishi tania: Hatyi semita tui tu tshesra nuwayatyeyawa-sutrusa towa tsi hanowishi washu neyetyishana-sutrusatyi? She Jesus e-tyayitsakuiya: Hatsu semita kutraishi? Shrue tyana; Maityana, e hatsue drugasha shikaashi. Shrue tsi hanowishi ai nu tsaatyi si nu ukuyani tyayayanikuiya, shrue we maityana semita e shikaashi chuiyatyeya, shrue tyuinamatawani, e chaotsayutsa, e ga-umatsityaimishi tyaiwayatyi, shrue ga-umatsityaimishi tsi hanowishi dyika ye. E shrue sai haupa tyaaape chatrukaii. Shrue kaatyumishi si dyu chuwatana, maityana kanashitu gutana chaatyu. She tyaapectyishi tyana miri hatruttsai, e hau yuwi kuiyawitra e iatra. E shrue tsi hanowishi ai si yuku tyaitrawa, kanue si dyu tyiupu, shrue Magadara hatsi kupichanishra hau taatsi.
- 16 She Parasai hano e Sadakai hano hawe tyeeuku, e tyiutanikuiyana tyuwittaana tsi haiytyi Kaunamatsi si utyiemitrani tyiemi gayiawatrani. She etyu tyaipeyuta tyayitsakuiya: Shapuka ni kaetrani kutrana, Anye nyeshityitruku, she tsamuka ni howaka kukani. E tsika gayu tse, Tsatsi tawa nieshikakunu, she howaka

kukani e nuka tsitotya. Gowa howaka tsityemitranshi shruwittawanisha, eku etyu chitye e kaetranishi  
 4 utyiemi-trani tsatsi itye shruwittawanishatya. Sutsi me e tuwe gayauiaityia kaatonimishi utyiemitrani tsiyaipatyikuiyana, etyu tsatsi tsi ishika utyiemitrani nyeyaapikunu, tu heme Jonah ga-utyiemitrani. Shrue tu tayatra e yuku si tsutyu.

5 She ga-umatsityaimishi wewisa hawe tyeeeku, e  
 6 tyiwatyumitruwi semita unatsiyi. E Jesus e-tyayitsakuiya: Chuwatsityishityia e bashru-trusa Parasai hano  
 7 e Sadakai hano kashratyi gaashetyishi. She ga-umatsityaimishi chayania: She tsatsi semita shiku-  
 8 uanatsitya. She towa Jesus kuwittawani e-tyayitsakuiya: Mame tu etse koimi kutruwahimatyishi!  
 9 Tsekoma shruwatsityishityia, tsatsi semita kutraishi niya ka? Tsatsi na truwittawanisha ku tsatsi trutyumisha taama semita e taama miri, e hatsu kanashitu dyu  
 10 shruwatanatyishi? Ku maityana semita e tyana miri, e hatsu kanashitu dyu shruwatanatyishi? Tsi gowa  
 11 tsatsi shruwittawanishatya tsa semita niya shrayimnatya, etyu bashru-trusa Parasai e Sadakai hano  
 12 gaa-kashratyi. Shrue tyuwittawana Jesus tsatsi tyanata bashru-trusa semita kashratyi, etyu emi Parasai e  
 13 Sadakai hano gaa-aisomeshitani.

14 Shrue Jesus Caesarea Philippi tsaashityitra ai shriena hau tsaatsi ni, ga-umatsityaimishi tyiwapeta  
 e-chatsa: Hau hano ga-mutyi sutyeshi suta hano gana?  
 15 Shrue tyanata: Mika gana Baptisma John tyuta, mika Elijah, e mika Jeremiah ku hau ye emi prophet  
 16 tseshi. Shrue tyayitsakuiya: Etyu hau hinome sutyeshi kutrana? She Simon Peter tyipeyuta tyanata: Christo,  
 17 tsiianishi Iusi ga-mutyi kuta. She Jesus tyipeyuta e taatsakuiya: Kutraueetyi Simon Jonah ga-mutyi; she  
 18 sinani e matsi tsatsi towa tyiemi kutyitranu, etyu Kaunamatsi gaapishi sa-naishityia. Shrue tsika hinome  
 19 shraatsakuiya, Yaoni-siwa kuta, etyu towa yaoni-tsa si dyu sa-aiwatyami naatra-si, e ushityi tsiama tsatsi niushia-tsiumanu. Kaunamatsi itye-tseshra aataawi

niukuii-shroma, she hautsi tui gaishibishra dyu shipashityanu, emi ai Kaunamatsi dyika tsiupashityanishi n'taku, e hautsi tui gaishibishra dyu shatoinaimanu, emi ai Kaunamatsi dyika tsatoinaimanishi n'taku.  
 20 Shrue ga-umatsityaimishi tyayatinaika heya tsatsi hau uppeni wa Christo tseshi.

21 Shrue ai si yuku, Jesus ga-umatsityaimishi dyika tyiemi tyaiwatyitani tsi gowa Jerusalem ye tsunyetyunishi e tsaya tsaaputyishi e chayani-tyitra e tsidyatranikusana niya mame tsi naoya nunatyumetyu, e shrue  
 22 nyeottawatyu, e shrue chami sai tsashityi dyu nyeeipatumetyu. E Peter tyitya, e shru ai si yuku tyiushikuiya tyanatasu: Huchani, towa hishrome dyika si tiye  
 23 e-pee; tsatsi mame towa e-naitra-shrunu. Etyu chaishigutra Peter taatsakuiya: Satan, hinome ai kaatya ye ima. Hinome dyika tsayawikawatsita kuta; Iusi tsi niya tsatsi shrutsityishitanu etyu hano tsi niya.  
 24 Shrue Jesus ga-umatsityaimishi tyayitsakuiya: Hau tsi e-kunu hinome dyika hamashu utsutsi, noyu tsi pautowi e ga-shukuchatsi dyu payaou, e hinome dyika  
 25 ye hamashu pikashu. She hautsi e-kunu ga-iani utragumi, tu niutratsiuma; e hautsi su-tsi niya ga-iani tu nitrakunu, emi niyainakuni. She haityi tsi niya hano  
 26 yuku naukumiku, tsi sai gaishibishra tsishia, e shrue noyu ga-iani tu tsiutranu? Ku haityi tsi niya ga-iani neyayakuku? She sekka hano ga-mutyi hawe tsunyeku,  
 27 ga-naishityia ga-umashitanishi niya, e Iusi ga-upeseyityaimishi niya, e shrue haupa nowaina, hatsu-maku ga-tanishi, si nyiwiyaaniku. Kaimatsi shrayitsakuiya, tui tseechanishi gayaa, tsatsi ushitoni nutruwa-  
 28 tsitawa-kusatya, menashru kuukachanatyi hano ga-mutyi hawe tsunyekunishi, ga-itye-tseshra niya.

17 E ai si yuku shichisu sai kaetrani, Jesus gayatawi Peter, James e ga-tyumu John, tiye dyu kotyu ye  
 2 tyayitrutse. E ai yani tseema maiani ma tse nanami tyitra, e oshratra me kuwawi tyiushityemitsita e ga-  
 3 wakuni shamutsi chaetra, gaishibishi ma tse. E mu,

- 4 Moses e Elijah chutyemitrano e tyiminatyikuiyana-tyutsi tyuwakachana. E Peter tyipeyuta e Jesus dyika taatsakuiya: Huchani, Tui sutyemishi tawa tsa. Tsi e-shrunu, tui chamie uameshityi nuwitra-si, ishike shrutsi niya, e ishike Moses kutsi niya, e ishike Elijah
- 5 kutsi niya. Tu na katsa ni, mu, kushityemitsitanishi henaty kunashipaty tayiwanani; e mu, henaty dyika si nu katsanishi tyanata: Towa sa-mutyi tsa, tsitsimunishi, emi niya shikunama; puikanaty. E ga-umatsi-tyaimishi kakanaty kowawawi niya nuka chuwachana,
- 6 e mame chaaputsa. Shrue Jesus tsutyu tyiwapakatsa, tyanata: Si dyu tyeepatyuni, e bami chaaputsa. Shrue si dyu kowakametya tsatsi hau tyiukachana, tu heme nowe Jesus.
- 7 Shrue kotyu hawe si nu tsekkuiya ni, Jesus tayayanikuiya tyanata: Bami towa tsiukachanishi hau pupena,
- 8 menashru hano ga-mutyi ushitoni si dyu tsiipaty ni. E ga-umatsityaimishi tyiupetawa, tyana: Tsekoma tsidyatranikusana kana, Elijah sekka tsaya n'yetsiku? E Jesus tyayipeyuta tyanata: Kaimatsi Elijah hawe
- 9 tsuku, e sai tsi shrami haku si nitraku; etyu shrayitsakuiya, Elijah mishru hawe tsuku, e tsatsi tyinimasyanatu, she etyu tsi gowa tsiwatsiputyishi e-tyityityia. Emi taa etyumu hano ga-mutyi niunatyumena-kusa.
- 10 Shrue ga-umatsityaimishi tyuwittawana tsaiminatyishi Baptisma John niya tsheshi.
- 11 Shrue tsi hanowishi hau tseetyupi, hatrutsai hawe tsuku kaashitotrumi tsatsakuiya: Huchani, sa-mutyi putyuyityikuiya, she gowa ma tsityita e mame kunatyu-
- 12 mesu, e haikami na tsipashi dyika nu kaotyaisita, e haikami na tsitsi dyika nu kushikumeta. Shrue kutramatsityaimishi dyika hau sewayutsemi, etyu tsatsi
- 13 itye tsiutsaipunaisetya. E Jesus tyipeyuta e-chatsa: A, Tsatsi uhimaty e yukuma e-tsekkuiyanishi kaatoni! Hatsumashu tuwe na naiwatyisu-sutrusa? Hatsuma-
- 14 shu nunatyumi-si? Tuwe kuyutsemi. E Jesus taatyinaika, shrue ganatyaya si tyuyumu; she mutye tsheshi ai si yuku tyiutsaipu.

- 19 Shrue ga-umatsityaimishi Jesus dyika hau tyeeku, e maku me tania: Tsekoma tsa itye siutyikumi?
- 20 E tyayitsakuiya: She koimiku kutra-uhimatyishi niya ka. She kaimatsi shrayitsakuiya, Tsi ishike waku kawitsi me kutra-uhimaty tnanu, itye towa kotyu nyenia-kutrusa, Tui yuku yuke tsuani, shrue tsunyeku;
- 21 e tsatsi tsi haityi e itye e-nitrana-kutrusatya. She etyu towa taa tsheshi tsatsi tuwe yuku si kumusunu, heme menashru amoma niya e ushrukamishi niya.
- 22 E Galilee ai dyu e-tsekkuiya ni, Jesus e-tyayitsakuiya: Hano ga-mutyi hano kamashityi dyika ye niyekuyana-tsaomasa; e shrue niyumutyitsana-tsiu-
- 23 masa, e shrue chami tsaashityi si dyu nyeeptyuni-tsaomasa. She mame ayama-tyusa.
- 24 Shrue Capernaum ai hau tseetyupi, aitsuwani sawaka kaukuiyaukuiyana Peter dyika hau tyeeku, tyana: Gao tsatsi kutrayi-someshita aitsuwani sawaka chaitsuwita? E chatsa: Ha. Shrue hawe katrutya ye si
- 25 kupuni, Jesus tsaya tyimina, tyanata: Simon, Gowa shru-tsityishita? Gaishibishra dyika dyu rai tsaaputyishi hautsi dyika si aitsuwani e ayaapi kaya-ukuiyana? Ga-mutyityaimishi dyika si, kume mika hano dyika si?
- 26 Shrue e-tsipeyuta ni, Mika hano dyika si. E Jesus e-taatsakuiya: Emi heya iatratyaimishi itye yuku tsee.
- 27 She etyu, tsa nyeyanachupatsa-shrusatyani, kutaa ye ima, shrue aityatyi hau ninawi-shru, shrue haikamiku hawe dyu kumunishi shikaashi dyu nayao-shru, shrue tsiika shra-shaatawitya niyaina-shru ishike sawaka. Tuwa shrayaanu e nyeyaawi-shru, shrutsi niya e sa-utsi niya.
- 18 Emi eyu we ura ga-umatsityaimishi Jesus dyika hau tyeeku tania: Kaunamatsi dyika hawi mame tsichunishi tsa? Shrue iatra hawe tyiupetsa, e ai suna si nu tyikuiya, e e-chatsa: Kaimatsi shrayitsakuiya, tsi tsa shrayaishigutraenu e towa iatra me e-kutrayatranu, Kaunamatsi itye-tsheshra mame tsatsi itye n'tyeepu-
- 4 kutrusatya. Emi heya hautsi towa iatra me amoma-

kaumanu, emi wa Kaunamatsi itye-tshesha dyika mame  
5 tsichunishi tsa. She hautsi ishike taa tse iatra kushu-  
6 tsa, tsika emi hinome shikushutsa. Etyu hautsi, tsi  
ishike towa iatra, hinome tsiuhimatyishi, kuupakashanu,  
mina tawa naetraniku tsi tsichu yaoni ga-witra ye si  
tsaoototyanyita, e kutaa tiye nu tshesha dyika nu  
tsaashikumematya.

7 Eiya, gaishibishra, upakashani niya! She gaishe  
hawe upakashani n'taku, etyu Eiya hano naetraku  
8 hautsi upakashani tsityitanu. She tsi shramashityi ku  
shrashityi kutrupakashanu, chuutsutrutsa e traawi;  
mina tawa naetranishru, bato tu me trukusutsitani e  
tsa itye-truni iani hau shrupunu, e tsatsi dyue shra-  
mashityityishi e dyue shrashityityishi tsiyakamitse  
9 tsipashi ye nu shaawitya. E tsi kutraana kutrupakasha-  
nu, dyu puku e tratyifru; mina tawa naetranishru, bato  
tu ishike kutraanaty, iani hau shrupunu, e tsatsi dyue  
kutraanaty shruwatyamutse tsipashi ye nu shaawitya.  
10 Bashru-trusa tsa haityi towa iatratyaimishi niwaiyana-  
kutrusatya. She shrayitsakuiya, ai Kaunamatsi dyika  
upeseyi-gaishimityishi dyutseshru Kaunamatsi ga-  
11 pishi sa-naishityia kowawi kuukachanikuiyana. She  
hano ga-mutyi hawe tsuku, kaitrawanishi ayatragumi  
12 niya. Gowa shru-tsyityishita? Tsi hau hano katsi-wa-  
katsi kanieru gatyashra, e ishike ai si yukuma tsukunu,  
gao tsa mayuka-wa-katsi mayuka tsitra ai tu gayatranu,  
e kotyu ye dyu yuku tsutsishi, yukuma tsu-tseshi  
13 tyiypatyikuiyanu? E tsi emi tsiyainakunu, kaimatsi  
shrayitsakuiya, mame mina yuku towa niya tsiuishityia-  
ni, tsatsi hemaku mayuka-wa-katsi mayuka tsitra tsa  
14 yukuma tsekkuishi kuwatsi niya. Emi taa tsatsi  
Kaunamatsi gaapishi kutra-naishityiashi ga-uwayani-  
shra towa iatratyaimishi ishike puta nayawaku ni.

15 She tsi kutra-tyumu hishrome dyika kokitsanu,  
hake ima, ga-ukitsishi tyiemi piutrani, nowe ai ku-  
traapi. Tsi kutru-kanu kutra-tyumu shiumatsani  
16 ushiawi. Etyu tsi tsa niukaka-kutrumanu, ishikashu  
ku dyuishu nyeyutse-shru, emi heya dyue ku chamie

shityishityiku niya sai tsi tzeni kaimatsi naetraniku.  
17 She etyu tsi tsa tuwa niwakaka-kunu, aiwatyami-gaya  
dyika nippe-shru; she etyu aiwatyami-gaya dyika tsi  
tsa niwakaka-kunu, nanami hano me e kaukitaukuiya  
18 me piukai. Kaimatsi shrayitsakuiya, haityitsi nipashi-  
tyana-kutrusatya, tui gaishibishra dyu, emi ai Kauna-  
matsi tsiupashityanishi n'taku; e haityitsi nyetoinaime-  
kutrusatya, tui gaishibishra dyu, emi ai Kaunamatsi  
19 tsatoinaimanishi n'taku. Tsika na shrayitsakuiya,  
hautsi dyue kutanu haityitsi niya kutruushranu, tui  
gaishibishra dyu, tsi kuwittaanutyu ka, emi Kaunamatsi  
20 gaapishi sa-naishityia dyika e-nieutrani-tsiuma. She  
hatyi dyue ku chamie, E-seshi niya, kaiwatyamishatya-  
nu, tsika ai niutaa-si.

21 Shrue Peter hawe tsutyu e tyanata: Huchani, hatsu-  
wa ka na sa-tyumu hinome dyika niukitsitaku ni, e  
niutaipunai-si? Kume menashru maityana-wa? Jesus  
22 taatsakuiya: Tsatsi shratsakuiya menashru maityana-  
wa, etyu menashru maityana-wa-katsi, maityana-wa.  
23 Emi taa, Kaunamatsi itye-tshesha haityi rai kushigayu.  
Towa rai tsitanitrantatyishi tsitrugayamitsishi sashi-  
24 tyina nitraku. Shrue shru kuwittawani, ishike hawe  
25 tayutsemitta katsi miri sawaka tyitrugayamishi. She  
etyu, tsa itye aitsuanwishi gashi niya, ga-huchani  
tyianikuiya towa tsitanitrani e ga-okui e ga-iatratyaim-  
26 ishishi e sai tsi gashi uishani, e shrue heya nitsuwaniku.  
Emi heya tsitanitrani nuka chucha kaashitotrumi,  
27 tyanatasu: Huchani, kuyukamini, shrue sai tsi niuitsu-  
wani-si. Shrue towa kutanitra ga-huchani tyutyuityi-  
kuiyani, si tyikuya e tsitrugayamishi tyiwataipunaii.  
28 She etyu, tuwa kutanitra hake si tyumu, shrue ishika  
kutanitra, katsi maityana tsitra sawaka tyitrugayamishi  
29 tyiyaina, she tyitya, ga-witra shru ni, e taatsakuiya:  
Kutratrugayamishi chaitsuwa. Etyu yu towa kutanitra  
nuka chucha tyiwittanikuiya tyanatasu: Kuyukamini,  
30 shrue niuitsuwani-si. Etyu tsatsi e-tyu, etyu tyiyutse  
ayatsitani dyika tyipunaii, menashru tsitrugayamishi  
31 nitsuwa-tsiumanu. Shrue mika kowatanitra tsi e-

kaetranishi kuukachanaty, mame ayamatyusa, she ga-huchanishi dyika hau tyeeku tyiupena sai tsi kui kaetranishi. Shrue ga-huchani hawe tyiuepeotsa, e 32 tyanata: Sutsi-me kutanira kuta! Tyuwittanikuiyani-shi niya, sai tsi we tyutrugayamishi shrawataipunaii; 33 emi e shrautyuityikuiya ni, trutyumu tsatsi tsika emi taa 34 shrutanitanutyu niutyuityikuiyatra? She ga-huchani chutsayawa, e gayatsitanikuiyana dyika hau tyikuya, 35 menashru sai tsi tsitrugayamishi naituwakunu, Emi taa Kaunamatsi gaapishi sa-naishityia hishrome dyika e-niyatra-kutruwatruma, tsi tsa kutraya-winoshika dyika si dyu haupa nuwaina kutra-tyumu shruwataipunaima.

19 She e-chaetra, Jesus towa mani gaunaottani, Galilee si yuku tsutyu, Judea hatsi kupichanishra, 2 Jordan chuna wewisa dyika ye tsutyu; e mame tsi hanowishi hamashu shichaaku; e ai tyiwatsaipunaima. 3 Shrue Parasai hano hawe tyeeku tyiutonikuiyana, tania: Ite e-ta, hatrutsai ga-okui tuwe haityi puta 4 shiya yuku ukuyani. E tyayipeyuta e tyayitsakuiya: Tsatsi na trukachana towa tsidyatrani, Tsaya tsaauitranishi hatrutse e kuitsa taauitra, e shrue e-chatsa, 5 towaya si dyia hatrutsai ga-naishityia e ga-naia tu nieitraku, shrue ga-okui dyika nityishityui-ku, she towa 6 dyue ishike sinani n'taakuu? Emi heya tsatsi na dyue tsaanu, etyu emi ishike sinani tsaa. Emi heya tsi haityi Iusi hau kuchukunu, bami hau hano piuchukutowa. She e-tania: E tsee, tsekoma Moses kuwaya yuku 7 ayakuyani-tsidyatrani ayaapi e shrue yuku ukuyani? E tayitsakuiya: Kutraya-winoshika gayayumishi niya, 8 kutra-okuishu yuku ukuyani Moses tutraiwaheetsani, she etyu tsaya si yuku emi tsatsi taa tsanu. She e 9 shrayitsakuiya, Tsi tsa tuwe uiani niya ka, hau tsi ga-okui yuku tsikuyanu, e shrue ishika tsiwakuitranu, tuwe uiani kokitsa; e tsika hau tsi yuku tsiukuyaniishi 10 tsiwakuitranu, tuwe uiani kokitsa. Ga-umatsiyaimishi e tania: Tsi towa taa tsanu, hatrutsai ga-okui dyika

11 uakuitranu tsatsi tawa tsa. She e-tyayitsakuiya: Tsatsi sai hano itye towa mani nayawakusatyanu, she 12 etyu nowe tsayaapishi. She mika tsa itye noiaseyikunishi noyu emi e ga-naia ga-washrani si tseemuni; e mika tsa itye noiaseyikunishi, hano niya tsaya-uitranaty; e mika tsa itye noiaseyikunishi, noyu emi e ka-uitrana, Kaunamatsi itye-tshesha kutsi niya. Hautsi itye towa mani niyashityuwanikunu, peeyashityuwani. 13 Shrue iatra hawe traawatrutsemitta, kamashityi niya niwapakatsaku ni, e amoma nitraku ni. She 14 ga-umatsiyaimishi tyiushikuiyana. Etyu Jesus e-chatsa: Payawaheetsanitta iatra hinome dyika hau utsutsi, e bashrumi tsa paiwayanitta; she towa taa tse 15 niya Kaunamatsi itye tshesha tsa. She kamashityi niya 16 kuwapakatsa ni, ai si yuku tsutyu. Shrue mu, ishike hawe tsutyu taatsakuiya: Tsayasomeeshita, Tsi haityi tawa tsheshi e nitra-si, emi heya tsiyakamitse iani nasinishi? E taatsakuiya: Tsekoma tawa tsheshi niya tyiupeta? Tawa tsheshi ishike e-tsa; etyu tsi iani dyika uyupuni kutru-tsiputyanu, tsiuwayanishi niwatsitokai- 18 shru. Shrue e-taatsakuiya: Haityi? She Jesus tyanata: Bami peiawa. Bami tuwe peiaua, Bami chuchawa. Bami tsa kaimatsishi shityishityiku chuwitra. 19 Tsiyumi paaitrani kutra-naishityia e kutra-naia. E gowa noyu shruitsimuni, emi e mika putsimu. 20 Shrue mutye tsa taatsakuiya: Sai tsi towa sa-utsitokai, 21 Haityitsi tsa sa-washu-trani. Jesus e-taatsakuiya: Tsi washu e-n'ta-shrunu, ima, tsi kutrashi nisha-shru, e shrue amome tsaaputyishi nyeiwakui-shru, e shrue Kaunamatsi dyika tsiyumishi naa-shru. E hawe, 22 hinome dyika ye hamashu chikashu. E shrue mutyetsa towa kaka ni, ayamaku ni yuku si tsutyu, she mame tsi chaishi. 23 She Jesus ga-umatsiyaimishi tyayitsakuiya: Kaimatsi shrayitsakuiya, nukaosaku riku tsheshi Kaunamatsi itye-tshesha dyika ye niupuku ni. E tsika na shrayitsakuiya, mina tsatsi kaosayu gameyu upunatsi 24 ga-ana dyika ye niukumunishi, etyu riku tsheshi Iusi ga-

25 itye tshesha dyika ye uyupuni mame ga-ukaosa. She  
 ka-umatsiyaimishi kakanaty, mame imi ma tayatra,  
 26 shrue tyana: She emi hawi itye nitraguku? She Jesus  
 tsiwamekumeni, tyayitsakuiya: Hano niya towa tsatsi  
 itye tsa, she etyu Iusi niya sai tsi itye tsa. Shrue Peter  
 27 tyipeyuta, e taatsakuiya; Mu, Sai tsi tu sitrana, shrue  
 hishrome ye hamashu saakashumi. Shrue tsi n'trashi-  
 28 sutrusa? E Jesus e-tyayitsakuiya: Kaimatsi shrayitsa-  
 kuiya, hinome ye hamashu shraakashumishi tsika na  
 iani tsaashityi, hano ga-mutyi ga-uamashitanishi dinya  
 tshesha ga-anamatyi ai si dyu kukuiya ni, trutyumu  
 katsi dyue tsitra dinya tshesha anamatyi ai si dyu  
 naata-kutrusa, e katsi dyue tsitraya Israel ga-hano-  
 29 tyaimishi niwatana-kutrusa. She sai heme katrutya,  
 ku ga-tyumutyaimishi e ga-watratyaimishi, ku ga-  
 kuitratyaimishi e ga-aotyaimishi, ku ga-naishityia, ku  
 ga-naia, ku ga-iatratyaimishi, E-seshi niya tu kayatra,  
 katsi-wa-katsi yuku nyeepeku, shrue tsiyakamitse iani  
 30 naku. She etyu naoya tsaya tsaaputyishi chai nataapu-  
 kusa, e chai tsaaputyishi tsaya nataapu-kusa.

20 She Kaunamatsi itye-tshesha, wa gayu chama  
 hake tsutyu, kowatanitra ga-mataiku tsaishra ye  
 nowatanitra-kusatyishi tyayayanikuiyanishi katrutya  
 2 yani tseshi kushigayu. She katsi maityana tsitra sentawa  
 ishike sai kowatanitra tsiwashrani, ga-mataiku tsaishra  
 3 ye tyiyata. E haityitsi chami ura kaetra ni, hake tyumu,  
 tsishityia tshesha dyika tu ma we tseemishi hawe  
 4 tyeechanishi tyiwakacha; shrue tyayitsakuiya, Trutyu-  
 mu mataiku tsaishra ye tyeeekuma, she shrami me  
 5 niwachani-shrawatruma. Shrue hake tyeeku. Tsika  
 na, haityitsi shichisu ura, e shrue mayuka ura kaetra ni,  
 6 taa e-tyitra. Shrue haityitsi katsi ishike tsitra ura.  
 kaetra ni, hake si tyumu e mika tu ma we tseechanishi  
 7 tyiwayaina, e shrue tyayitsakuiya: Tsekoma tu ma  
 tuwe settyutse kutyeechanishi? Tania: She tsatsi hau  
 8 utrani shityayayanikuiya. She e tyayitsakuiya: Trutyu-  
 mu mataiku tsaishra ye tyeeekuma. Shru, shapuka ni,  
 mataiku tsaishra yani tseshi ga-umatsi tatsakuiya,

Kowatanitra puwapeotsa, shrue gowa gayatyumishi  
 payatsuwa, chai dyika si shrototsani, tsaya dyika hema.  
 9 She katsi ishike tsitra dyika ura tsayayanikuiyanatyishi  
 hawe tsekkuii, haupa sai heme katsi maityana tsitra  
 10 sentawa tyayatsuwa. She tsaya tseshi hawe tsekkuii,  
 tyinaetrani mina yuku nutrayaitsuwani-kusanu, etyu  
 etyumu tsika hemaku tyayatsuwa, katsi maityana  
 11 tsitra sentawa. Shrue kaukuiwatyi, yani tseshi dyika  
 12 tsi tania, tyana, Towa chai tsaaputyishi tu ishike ura  
 kuwatanitra, she etyu hinome sutaaputyishi sai settyu-  
 tse kaosame tseshi e ganani suwanatyumenatyishi  
 13 sashityina shrayatra. Etyu tyayipeyuta haityi e taatsa-  
 kuiya, Sa-ukini, tsatsi tsi sutsi me e-shraitra. Gao  
 tsanu katsi maityana tsitra sentawa niya tutruushra?  
 14 Dyu chayaou kutrashi, e yuku ima; she e-si towa chai  
 15 tsaaputyishi e hishrome sashityina ayaapi. Tsatsi itye  
 tuta, tsi sashi noyu gowa e-nitrasinishi? ku emi hinome  
 16 tawa sutanishi niya, sutsishu tutraanaty? Emi taa chai  
 tseshi tsaya n'taku, e tsaya tseshi chai n'taku. She  
 naoya tsa tsiwapeotsi, etyu hatsue tsayaataawi.

17 Shrue Jesus Jerusalem ye dyu ga-ani, ga-umatsi-  
 tyaimishi yuku tyayitrutse, e hake tsekkuiya ni tyayi-  
 18 tsakuiya: Mu, Jerusalem dyika ye dyu sutyeeeku, shrue  
 hano ga-mutyi yani tseshi chayani e tsidyatranikusana  
 dyika hau n'yekuyana-tsaomasa, shrue ushitioni nyeeu-  
 19 masaku, e nanami hano dyika hau n'yekuyana-  
 tsaomasa, nyiemayani-tsiumasatyishi niya ka, e  
 nishayana-tsiumasatyishi niya ka, e shukuchatsi dyika  
 si nu niyetotyana-tsiumasatyishi niya ka; shrue ai si  
 chami tsaashityi dyika, si dyu nyeeipatyumeku.

20 Shrue Zebedee ga-mutyiyaimishi gaa-naia hawe  
 tsutyu ni chaashitotru, e tsi haityi tyuwittaa. She Jesus  
 21 tyanata: Tsi kutrutshipu? Shrue tyanata: Chuwaya towa  
 dyue sa-mutyiyaimishi kutra itye-tshesha dyika  
 nukuiyanukuu, hishrome shruiyanu, ishike shrumika-  
 22 waya si nu ye, e ishika ishuya si nu ye. Etyu Jesus  
 tyipeyuta, tyanata: Tsatsi shrutonime tsi tyuwittaanishi.



23 Iyte niishikatra-shru niishikasinishi ushikaty? E tania:  
Iyte sutaa. Shrue tyayitsakuiya: Kaimatsi sa-ushikaty  
dyika si nitraashikata-kutrusa, etyu sa-shrumikawaya  
e sa-ishuya ukuiyani tsatsi ayaapi itye shityanu, etyu  
24 sa-naishityia haku gaiwatranityishi. Shrue katsi ga-  
umatsityaimishi towa kakani, dyue kayatyumushi dyika  
25 tsatsi anye-tyiwautra. She Jesus hawe tyipeotsa  
tyayitsakuiya: Shrutonimasa, nanami hano dyika ga-  
huchani tseshi mame gowacha e ga-dinya tseshi itye  
26 tsiwautyita. Hishrome kutyeeema tsatsi emi taa n'taku-  
nu. She etyu hishrome kutyeeema hautsi dinya nitra-  
tsiumanishi tsiutsiputya ayaukashani kutrashi n'taku.  
E hautsi kutyeeema dyika tsaya n'takunishi tsiutsiputya,  
28 utanitrani kutrashi n'taku. Emi taa hano ga-mutyi hawe  
tsutyu, tsatsi nyeeokashaku ni, etyu no nyeyaokashaku  
ni; e ga-iani hawe nitraku ni, naoya tsa hano kuwatsi  
niya aitsuwani n'takunishi niya ka.  
29 Shrue Jericho tsaashityitra si yuku tsekkuiya ni,  
30 tsi hanowishi Jesus dyika hamashu shichaaku. E Mu,  
dyue hatrutsai tsa-tsaakashityishi hiyani ishikayashu  
si tyaa, e Jesus tsiyatyutsatani kaakani tyaatyikoesu  
tyaanikuiya: Huchani, kuutyuityikuiya! David ga-  
31 mutyi kutyeshi! She tsi hanowishi tsiwishikuiyana,  
maku nutruukunutyityishi niya ka. She etyu mina  
hemashu tyaatyikoesu, tyaanikuiya: Huchani, Kuutyui-  
32 tyikuiya! David ga-mutyi kutyeshi! She Jesus  
chutyutsi tyuupeotsa tyaatsakuiya: Tsi kui kutruutsipu  
33 niyeitra-shraomanishi? Taniaputyu; Huchani, sutraa-  
34 ana si nyeeta-shikummanishi. She Jesus tsiutyuityi-  
kuiyani gaa-ana tyuupakatsa, shrue tu haikamiku si  
taaikashityitratya shrue hamashu tyeeeyu.

21 Shrue Jerusalem hawe ena tsekkuiyi, Olive kotyu  
hawe e Bethphage tsaashityitra hau tyeetyupi, Jesus  
2 dyue ga-umatsityaimishi hake tyaakuiya, tyaatsakuiya:  
Wa ai tsaashityitra hake tyeema, shrue tu haikamiku  
huru kaatyumishi niyainaputyi-kutruu, e washityi tsa  
ai n'traakuu, niukatyumitwanu-kutruu, shrue tuwe

3 niyeyutsetyu-kutruu. E hautsi haityi tsi kui kutraatsa-  
kuiya nitraanikui-kutruu, Huchani niutyawa-tsiuma,  
4 shrue haikamiku nyeeekuiyaku. She towa e kaetra emi  
heya prophet niya e-katsanishi e-naitrakunishi niya ka;  
e-chatsa:  
5 Zion ga-maku niuppenna-kutrusa, Mu, Kutra-Rai  
tuwe niutsuku-kutruma, shrana tse ni, e huru  
niya dyu gaapi, e uputyinami huru hatrutsa  
washityi niya dyu gaapi.  
6 She ga-umatsityaimishi hake tyeeeyu, Jesus tsaayani-  
7 kuiyanishi e-tyitranu. Shrue huru e washityi hawe si  
tyaayutsetyu, shrue ga-wakuni ai dyu tyishanatyu,  
8 shrue ai si dyu chukuiya. E naoya tse tsi hanowishi  
gaawakuniversityaimishi hiyani dyika ye nu tyishana, etyu  
mika kiwa tseshi tsaashityumishi chaotsutrutsana,  
9 shrue hiyani dyika ye nu tyishana. She ai yani tsekkui-  
yanishi tsi hanowishi e hamashu tsekkuiyanishi  
tyuwashigaisita, tyana: Hosana, David ga-mutyi!  
Uamashitani tsa, Huchani E-gashi niya hawe tsutseshi!  
10 Hosana dinya tseshi! Shrue Jerusalem hau tsaatsi ni,  
sai tsaashityitra ganashiyani tayatra, e tyatsia: Hautsi  
11 towa? She tsi hanowishi tyana: Towa prophet tseshi  
Jesus, Galilee hatsi, Nazareth tsaashityitra si.  
12 Shrue Jesus tsityumi-katrutya hake tyiupu, e  
sawaka gayayakuse gaa-mesa tyayatsitamatsa e tsika  
13 huuka tsiyatityia ga-anamatyishi; she tyayitsakuiya:  
Emi e tsidyatrani, Sa-ama ai amoma utrani katrutya  
nieinimasaku, etyu kuwachawaityia katrutya shruwa-  
14 uitrana. She tsa-tsayakashityishi e gowakusutsitanishi  
ai tsityumi-katrutya gaapishra hau tyiwatsekku, shrue  
15 tyiwatsaipunaii. She etyu yani tseshi chayanityitra e  
tsidyatranikusana tsi kui imi me e-tsitraniishi e ai  
tsityumi-katrutya dyika, Hosana, David ga-mutyi  
katiyiniyanyityishi iatra kowakanatyi, chaatsayawana.  
16 Shrue e-tania: Traka tsi gowa kanatyishi? E Jesus  
e-tayitsakuiya: Ha, Tsatsi na tsidyatrani trukachana,  
gowa owaka e tseeshityekuiyanatyishi tsaya-ka si dyu  
17 kukimunishi uamashitani kutra? She tu tyayatra, e

tsaashityitra si yuku tsutyu, e Bethany hau taatsi e ai chukuiya.

18 Shrue na nu gayutse, tsaashityitra hake si tsutsi,  
 19 tyiyamashito. She fig-hitrae hiyani ishikayashu kuukachani, hau taatsi e tsatsi tsi ai dyu tyiukacha, tu heme masani; she taatsakuiya: Wai si yuku tsiyakamitse hema tsatsi na hitrani e-niutyita-kutrumanu. She tu haikamiku hitrae tyipanito. She ga-umatsityaimishi kuukachanaty chaaputsa, e tyatsia: Gowa fig-hitrae haikamiku tsipanito? She Jesus tayipeyuta tyanata: Kaimatsi shrayitsakuiya, tsi uhimaty kutraashityanu, e tsi tsa tu ushinaetranishatyanu, tsatsi tu heme fig-hitrae tsaetranatyishi e-nitrana-kutrusatyanu puta, she etyu tsi towa kotyu shaniyanu: Dyu putraatawa, shrue kutaa ye nu putraatyitruui, emi e naitraku. E tsika sai haityitsi amoma-utrani niya shruwauttaanatyanu, kutruwahimaty, nayaawa-kutrusa.

23 Shrue tsityumi katrutya hake kupuni, tsayasomeshitani, yani tsheshi chayani tsaaputyishi, e hano tsaya tsaaputyishi hawe tyiwatsekku, shrue tania: Haiyti tsi itye niya towa e-kutyekkuuiya? E hau towa itye kutyitruani? E Jesus tayipeyuta tyayitsakuiya; Nutyumu ishike mani niwapeta-shrawatruma, shrue towa tyupenatyanu tsika hinome niwape-shrawatruma haiyti tsi itye niya towa e-sutyekkuuiyanishi. John ga-baptisma, hatyi si tsa? Kaunamatsi dyika si, kume hano dyika si? She chuwasityishita, tsi natrana-sutrusatyanu: Kaunamatsi dyika si tsa; e-nyetsakuiya-shikuwatrumanu, She e tsekoma tsa shruhimatawana. Etyu tsi natrana-sutrusatyanu, Hano dyika si tsa; tsi hanowishi shikai-putsani, she sayu tse John prophet tsheshi tsyukakii.

27 Shrue Jesus tyipeyutana, tyana; Tsatsi shikutonimasya. Shrue tyayitsakuiya: Tsika tsatsi e-shrayitsakuiya haiyti itye niya towa e-sutyekkuuiyanishi. Etyu gowa shrutsityishityia? Hatrutsai dyue cha-iatratyai, she tsaya tsheshi dyika hau tsutyu, tyanata: Iatra, Nake, wai mataiku tsaishra ye chutanitra. She tyamashra e tyanata: Tsatsi e-shikunu. She etyu hatsumashuku

30 chuwataipunaii, shrue tsutyu. Shrue ishika dyika hau tsutyu, tsika emi e taatsakuiya; she tyipeyuta taatsakuiya: Ha, naishityia. Etyu tsatsi tsutyu. Haiyti towa dyue ga-naishityia ga-uwayani e-tsitra? E tania; Tsaya tsheshi. She Jesus e-tayitsakuiya: Kaimatsi e-shrayitsakuiya, aitsuwani-kaukitaukuiyana e kanaty hishrome dyika ai yani Kaunamatsi itye-tsheshra dyika ye netyeekukusa. She hawe kutruwa-tsuku John uitonimi hiyani ye, e tsatsi shiuhimatawanatya, etyu aitsuwani-kaukitaukuiyana e kanaty tsiuhimatawana; etyu trutyu, shruukachanaty si yuku, mame tsatsi shruwataipunaimetyanu emi heya niuhimatawana-kutrusatyishi.

33 Ishika uwaseni trakani. Hau hatrutsai gaama yani tsheshi. Wa mataiku chaityi, hake bashruni chupisha e ai nu chaushitotsa mataiku-uatsishitowani, tsitru dyu katrutyishi chaatra, shrue towa kotanitra ushiti tyiuyani, e ai yuku si tsutyu. Shrue hemaku hitrani naetraku ni hawe ena kaetra ni, ga-umatsityaimishi kowatanitra dyika ye tyayayata, hitrani e-kaetranishi utyiawi niya. Shrue kowatanitra ga-umatsityaimishi tyayityata, e ishike tyushayana, e ishike chaottawa, e ishike yaoni niya tyuyutsana. Shrue tsika na, tsaya tsiyatanishi mina yuku mame naoya kowatanitra tyayayata, she emi taa tsika na e tayatrana. Shrue hamashu tse ga-mutyi tyikuiya, e chatsa: Sa-mutyi niutsitokai-kusa. She etyu kowatanitra ga-mutyi kuukachanaty, chayania, Towa nawiyaanikunishi tsa, shru nauttawa e nayaawa tsi nawiyaatyikunishi. She tyityata, mataiku tsaishra dyika si tyaawii, shrue chauttawa. She mataiku tsaishra yani tsheshi hawe tsunyeku ni, tsi kui towa kowatanitra niyatratyaku?

41 Tania: Kawasa me towa sutsi-me kowatanitra e neyatratyaku; shrue mika kowatanitra dyika mataiku tsaishra nyewayaaniku, towa kowatanitra hitrani chitye kaetrani niuyanitta-tsiumasa. Jesus tayitsakuiya: Iusi tsidyatrani dyika nu, tsatsi hama trukachana?

Kaatraitya tsa kuushranishi yaoni, towa emi

shukuna ga-nushika tyiuitrani. Towa Huchani dyika si tsutyu, she sutraya-ana dyika imi ma tse.

- 43 Emi heya e-shrayitsakuiya, Iusi ga-itye-tshesha niwisa-tyutsana-kutruwatrumasa, e shrue ga-hitrani hau e tsitranshi hano niyaapiku. She hautsi towa yaoni dyu kautyaisa kayu-nyeku, etyu hautsi tsainatsima, nieityiyuwatsiuma.

- 45 She yani tsheshi chayani e Parasai hano ga-uwaseni kakanaty kaatrutsi niya e-chatsanishi tyiwittawana.  
46 E gaika nityata-tsiumasaty, tsi hanowishi niya chaaputsana, she prophet tsheshi tyiyukaii.

- 22 E tsika na Jesus tyaipeyuta e tyayitsakuiya  
2 uwaseni niya, e chatsa: Kaunamatsi itye-tshesha, wa emi eyu rai ga-mutyi uwakuitrani bashruku tyiutrani  
3 kushrugayu. Emi wa kowatanitra hake tyayayata uwakuitrani bashruku ye tsiwashutsanishi uwapeotsi; e  
4 tsatsi hawe utsutsi e-tyusatya. She tsika na, mika kowatanitra hake tyayayata, tyayitsakuiya, Tsiwashu-  
5 tsanishi powapena, Mu, sa-tyishani haku sitra, sa-yashratawanishi suwa, e sai tsi haku tsa, uwakuitrani-  
6 bashruku hawe tyekkuma. She etyu tsatsi tsi yatra tyusatya, e yuku tyeeuku, ishike gashra ye, ishika  
7 tyishita ye, e mika katanitranyaimishi tayityata, e ganunani ye e-tayatyitya, shrue chuwawana. She etyu  
8 rai chutsayawa, shrue gawainityaimishi hake tyayayata e we kayawatratyia sutsi me tyayatra, e gaashityitrashi  
9 tayaka. Shrue ga-tanitranyaimishi tyayitsakuiya, Uwakuitrani-bashruku haku tsiutrani, etyu tsiwashu-  
10 tsanishi tsatsi yatra tsaaputya. Emi heya, nake, hiyani dyika ye tyekkuma, e hatsu tsi shruwatya-  
11 watyanu uwakuitrani-bashruku dyika ye niwashutsana-  
kutrusa. She towa kowatanitra hiyani dyika ye hake tsekkuiya, she hautsi tsiyainawatyishi sai heme tyiwa-  
tyami, shikaewa sutsi tsaaputyishi e tawa tsaaputyishi, shrue uwakuitrani-gaya gayatanyetyishi niya tyutaa.  
11 Shrue rai hawe kupuni, gayatanyetyishi kuwakachani, tsatsi uwakuitrani-wakuni kowakunishi ishike hano

- 12 tyiukacha. She taatsakuiya, Sa-ukini, tsatsi uwakui-  
trani-wakuni shruwakuni gowa hawe shrupu? She  
13 tsatsi itye chatsa. Shrue rai kowatanitra tyayitsakuiya,  
Piupushityanitta, kamashityi e kashityi ye, shrue yuku  
piyutsee, e chaatya tsamishityishra hake traawii. Wa  
ai niyetyikuiyaniku e hachani nyeiushikunutsitaniku.  
14 She tyiwaapeotsanishi naoya tsaapu, etyu tsayayaata-  
wishi hatsue tsaapu.

- 15 Shrue Parasai hano ai si yuku tyekkuiya, e tsi  
tyiwittawityia gowa e-katsanishi niya nityata-kusatyi-  
16 shi. She kayisomeshtyiatyishi hake tauyatanitta,  
Herodia tsayinimasatyishi hano gayaatse, tyana:  
Tsayasomeeshta, siutonimasa hishrome shraimatsishi,  
e Iusi ga-hiyani kaimatsi niya shayasomeshta, e tsatsi  
hau shrutsityishitanu, she tsatsi hano kowawi shruwa-  
17 kachanikuiya. Emi heya kowappe, gowa shrutsityishita,  
18 Caesar dyika aitsuwani aapi itye ta, ku tsa? She  
Jesus towa sutsi me tsheshi tyiwittawa, shrue e-tyayi-  
19 tsakuiya: Tsekoma tyiutanikuiya, kauitutyityia! Hanye  
aitsuwani sawaka kaukacha. Shrue taikkuimitta  
20 ishike sawaka. She tyayitsakuiya: Hau towa kadya-  
trani e towa tsidyatrani? Shrue tania: Wa Caesar gashi.  
21 Shrue tyayitsakuiya: Emi heya Caesar gashi Caesar  
hawe niutranitta-kutrusa, e Iusi gashi Iusi hawe  
22 niutranitta-kutrusa. Towa kakanaty imi ma tayatra,  
shrue tu tyitrana, e yuku si tyeeuku.

- 23 Emi e tsaashityi Sadakai hano hawe tyeeuku. Towa  
hano tyaanatata ushitoni si dyu uipatyini tsatsi tsanu.  
24 She emi tyiupatawa tyana: Tsayasomeeshta, Moses  
kanata tsa ga-iatratyainu tsi hatrutsai kushito, ga-  
tyumu towa ga-okui niwakuitratsiuma, shrue kutsi niya  
25 naiatratyiku. She maityana gaya-tyumutyaimishi tuwe  
sutyekkuiya, e tsaya tsheshi tsiwakuitrani kushito, etyu  
tsatsi ga-iatrashi ga-okui ga-tyumu ai tyiukkuiyani,  
26 she tsika emi taa dyue dyika nu, shrue chami dyika nu,  
shrue emi e tsika chaetra maityana dyika nu hema.  
27 Shrue sai ai hamashu kui tsheshi kushito. Emi heya,  
28 ushitoni si dyu uipatyini dyika towa maityana dyika si

- hau ye emi naokuiku, she sai haupa ga-okuishi.
- 29 Etyu Jesus tyayipeyuta, tyanata: Kutruwaukusu, she tsatsi shruwittawanishatya Iusi tsidyatrani e Iusi tsishatsishi. She ushitoni si dyu uipatyini tsee ni, tsatsi tsayawakuityitanu, ku tsatsi tsayawakuityitanittatya. She etyu Kaunamatsi dyika Iusi ga-ukupseyi-tyaimishi-me tsa. She etyu ushitoni si dyu uipatyinishi niya Iusi kutraininatyishi tsatsi na truukachana? E-chatsa:
- 32 Tu hinome Abraham ga-Iusi, e Isaac ga-Iusi, e Jacob ga-Iusi suta.
- 33 Iusi, wa tsatsi kushitonishi dyika Iusi tsanu, etyu emi tsiianishi dyika. Shrue tsi hanowishi kakani mame imi ma tayatra tsayasomeshitanishi niya.
- 34 Shrue, Sadakai hano maku kayatrani Parasai hano kakanityi, chaiwatyami. She towa haityi ishike
- 35 utsitokai-kusu tyiupeta, tsiutanikuiyani: Tsayasomeeshita, Utsitokai dyika haityi yuku tseyatyimishi
- 36 tsiuwayanishi tsa? She e-taatsakuiya: Sai kutra-winoshika niya, e sai kutra-maiani niya, e sai kutra-utsityishitani niya Huchani kutra-Iusi niutsimu-shru.
- 37 Towa yuku tseyatyimishi e tsiyatyuwi tsiuwayanishi.
- 38 E hamashu tseshi emi kushrugayu; towa tsa: Gowa noyu shruitsimuni, emi e mika hano putsimu. Towa dyue tsiuwayanishi si nu tsipatrutya sai utsitokai e prophet katsanishi.
- 39 She Parasai hano ai kaiwatyamityi Jesus upetawi tyiwapeta, tayatsakuiya: Christo dyika gowa shruwatsityishityia? Hau ga-mutyi tsa? E tania: David gamutyi. Shrue tyanata: She gowa emi maianishi niya David, Huchani, emi e taatsakuiyasu, e-chatsa:
- 40 Huchani, sa-huchani tsatsakuiya, shrumikawaya sa-mashityi ai si nu chukuiya, menashru kutruianatyishi kutraashutyifratsi seyawitranu.
- 41 She tsi David, Huchani tsatsakuiyasu, gowa emi ga-mutyi tsa? She tsatsi itye hautsi ishike mani puta nipeyutatyuma, e towa tsaashika si yuku tsatsi na hau chaoyetsa tsi upetawi niupetakunishi.

- 23 Shrue Jesus tsi hanowishi e gaisomeshitanishi tyayitsakuiya, tyanata: Tsidyatranikusana e Parasai hano Moses ga-anamatyi ai si dyu chaatyita.
- 2 Emi heya sai tsi kutrayitsakuiyanatyanu, emi towa e-pitrana, e niwatsitokai-kutrusa; etyu bashrumi gaitanishi truwawichawa, she e-katsia, etyu tsatsi tsiyityiatya. Kaimatsi gayutayani tsipatyase, e kaosa utyityinami, e mika hano gayayushi ye dyu tsishityikuiyana, etyu noyu tsatsi gayamashitya niya puta niyeitsutsana-kusatya. She etyu sai tsi gaitanishetyishi hano niukachakunishi niya e tsa. She anye-kusa gautsayumishi gaacha gayatyityia, e ga-wakunishi hake dyu ye gowa-utranishi tsiya gayatyityia, e bashruku dyika ye yani tshesra, e aiwatyami-gaya dyika ye dinya
- 3 anamatyi tshesra, e tsishityia-shra dyika ye Gowa tsi niyeityityia-tsawamasatyi, e Rabi neenia-tsiwatrumasatyishi. She etyu, bami Rabi putrayania, she ishike
- 4 kutrayisomeshita, e sai shraya-tyumushi. E bami hau gaishibishra dyu kutra-naishityia penia, she ishike
- 5 kutra-naishityiashi, emi wa Kaunamatsi gaapishi. Ku bami Huchani putraiania, she ishike kutra-huchani, emi
- 6 Christo. She etyu, kutruwataa mame dinya tseshi
- 7 kutrayaokashani n'taku. E hautsi noyu dinya kuuamashityitanu, nutsia nieitranaku, e hautsi nutsia kaetyitanu, dinya nieitranaku.
- 8 Etyu Eiya! Kutyeema tsidyatranikusana e Parasai hano kaitutyityiana! She Kaunamatsi itye-tshesra hano dyika si shrayaataityia; she tsatsi noyu hau kutyeepusunu, e hake tseepusushi tsatsi shrayiwaheetsitanityiatya uyupuni.
- 9 Eiya kutyeema, tsidyatranikusana e Parasai hano kaitutyityiana! She kushityi tsaityaitrumanishi gratrya hau kutratotsishi, she etyu tuma ayawitutrani niya ka, tsitru amoma-utrani shruwauityityia; emi heya niyaawa-kutrusa mame mina yuku tsichuni utsitani.
- 10 Eiya kutyeema, tsidyatranikusana e Parasai hano kaitutyityia! She kutaa e hatsi dyu sai ai shra kutyekkuiyata ishike puta kutra-utsikumishi dyika hau

niunutsana-kutrusatyishi niya, shrue e-tsitrano, tsi hishrome shruwatyamutse ga-mutyiyaimishi kutaapuyanu, emi wa dyuyashu shruwatyamutse ga-mutyi shityityia.

16 Eiya kutyeema, tsa kutrayakashityishi kutrayatrusteyana e kutraitsianishi Hautsi tsityumi-katrutya niya kaakaesunu tsatsi tsi haityi tsa; she etyu hautsi tsityumi-katrutya ga-uru niya kaakaesunu, gaityishru kitrakayami.

17 Tsa gowa shrunimasatyishi e tsa kutrayakashityishi! She haityi tsishatsi, uru kume tsityumi-katrutya, uru tsityu-tsityitanishi? E tsika, Hautsi tsaapaishi niya kaakaesunu, tsatsi tsi haityi tsa; etyu tsaapaishi dyika dyu tsaashityiakumishi niya kaakaesunu, gaityishru kitrakayami. Tsa kutrayakashityishi! Haityi tsishatsi, tsaashityiakumishi kume tsaashityiakumishi tsityu-tsityitanishi tsaapaishi? She hau tsaapaishi niya kaakaesunu, tsaapaishi e sai tsi ai dyu tsishimishi niya kaakaesu; e tsityumi-katrutya niya kaakaesunishi, tsityumi-katrutya e ai gaya gaamishi niya kaakaesu; e Kaunamatsi niya kaakaesunishi, wa emi Iusi gatsityumi-anamatyi e ai si dyu kakuiyanishi niya kaakaesu.

23 Eiya tsidyatranikusana e Parasai hano kaitutyityiana! She shanu e anise e koranto katsi uityimi si ishike yuku shrayaokuiyana; etyu tu shrayatranaty yuku gayutayanishi utsitokai, towa, shrami tseshi, ayawatyuityi e uhimaty; etyu towa gaika e nitranakutrusa e tsika gaika tsatsi we ishika tu e nitranakutrusatya. Tsa tsayakashityishi gayatrusteyana kutyeshi washikaatsi shautsishitowapesu e gameyu shushu kutyee!

25 Eiya tsidyatranikusana e Parasai hano kaitutyityiana! She ushikatyi e waishitani chaatya shriena dyu shrauyashityise, etyu ai gaya nu utani e tseyatyimi guta gayaty. Tsa-tsikashityishi Parasai hano! Tsaya ushikatyi e waishitani ai gaya nu chuyashityi, emi heya chaatya shriena dyu tsika niuyashityimiku.

27 Eiya tsidyatranikusana e Parasai hano kaitutyityia! She tsayatsemi ayatyaitsimishi ma kutyee. Towa kaimatsi chaatya shriena dyu anyume tseshi, etyu gaya ye shumu haashigani guta, e sai tsi adyema tseshi.

28 Emi taa trutyu mu, chaatya ye hano dyika uitonimi ma kutyee, she etyu gaya ye uityutitani e sutsishuni kutruwakai.

29 Eiya tsidyatranikusana e Parasai hano kaitutyityiana! She prophets gayityaitsimi shraatraityia e kuwautonimishi gaya-mutyaitsimi anye shraya-tyityia, shrue kutrana, Tsi sutra-naishityiashi tseemi yue hama sutyemanu, tsatsi prophets ga-matsishi niya natrayamatsana-shikusatya. Emi heya noyu shrami shityishityi-kutyityia, prophets kuwawanatyishi ga-iatratyaimishi kutaapu. She kutra-naishityiatyaimishi ga-uityimetyishi trataanaty. Shruwi kutaapu! Shikaatyu ga-iatratyaimishi kutaapu! Gowa shruwatyamutse tsyatanishi si yuku natrapayu-kutrusa? Emi heya, mu, prophets e kutonimasatyishi e tsidyatranikusana nyewayatani-shrawatruma; shrue towa dyika si mika nuwawana-kutrusa e shukuchatsi dyu niyewapukakatsanitta-kutrusa, e mika kutra-aiwatyami-gaya ye niyashayana-kutrusa, e tsaashityitra ma naupashanakutrusa, emi heya sayu uitonimishi matsi, gaishibishra dyu tsiwawatsemu tsaya-tranatyishi, uitonimi tseshi Abel si yuku Barachias ga-mutyi, tsityumi-katrutya e tsaapaishi ai sunama shrauttawanishi Zacharias hema, ai dyu nutrashi-kutrusa. Kaimatsi shrayitsakuiya, sai tsi towa wai kikatsanishi hano ai dyu nutrashikusa.

37 A, Jerusalem, Jerusalem, prophet tseshi shruwanatyishi e hawe kutraiwayatanittatyishi yaoni niya shruwayutsanishi, hatsu wa shikutsipu kutra-iatratyaimishi niwatyau-sinishi, hanai ga-washityitratyaimishi kowasu naya ye tsiwatyasushi me, etyu tsatsi kutrutsiputya. Mu, kutratrutya tu tsa nyeiwakuiyanitta-kutruwatrumasa. She e shrayitsakuiya, tui si yuku tsatsi na niukachana-tyiumasatya, menashru

kutranaty, Uamashitani tsa, Huchani E-gashi niya hawe tsutseshi.

24 E Jesus tsityumi-katrutya si tyumu, e ai yuku si gaani, e gaisomeshitanishi hau tyiwatseeku, tsi-tyumi-katrutya katrutya piukachana-tyumasa. She etyu Jesus tyayitsakuiya, Sai tsi towa truwakachana? Kaimatsi shrayitsakuiya, Tui tsatsi ishike yaoni puta tsayaushiputyishi nietyukunu, tsa putsatsishi.

3 Shrue Olive kotyu si chukuiya ni, gaisomeshitanishi nowe hawe tyeeuku, tyana, Kuwappe hama towa e naitraku, e tsi gowa tyiemi n'taku hawe tsunye-shru ni, e gaishibishra kuinaotta ni? E Jesus tyayipeyuta e tyayitsakuiya, Bashru-trusa tsa hau hano yukuma nyeitrutse-kutruwatrumanishi. She naoya E-seshi niya hawe n'tyeekusa n'tranakusa, Tu hinome Christo suta; e shru naoya tsa yukuma nyeitrutseyi-kusa. E apatramuni e apatramuni niya tsutyuminishi natrakani-kutrusa. Bami gowa-truwautra. She sekka towa e naitranaku; etyu kuinaottanishi tsatsi na tsanu. She hano ishika hano dyika ganashiyani nayatyityia-kusa, e rai-itye-tseshra ishika rai-itye-tseshra dyika, e matyuku, e hatsi-uwukutsishi hatyiku e nu e-naetraku. Etyu sai tsi towa niya ayama tsheshi menashru haikami n'taku. Shrue hau niyeyatana-kutruwatrumasa sutsime ayatytani niya ka, e niyewana-kutruwatrumasa, e E-seshi niya sai hano niwaiyanisa-kutruwatrumasa. E shrue naoya tse nanachupatsa-kusa, e hau nayakuyatyia-kusa, e nowaiyanisa-kusa. E naoya tsa tsa kaimatsishi prophet tsheshi dyu nautraashru-kusa, e naoya tsa yukuma nyeitrutseyi-kusa. She sutsishuni nitaanikunishi niya, naoya tsa ga-utsumunishi nye-yashityito-tsiwatruma. Etyu kuinaottani hema kaushigitsanishi, emi nitraguku. E towa tawa-mani, ityetseshra niya ka, gaishibishra sai hema shra nikatsaniku, sai hano dyika shityishityiku n'takunishi niya ka. Shrue menashru nuinaottaku.

15 Emi heya, prophet tsheshi Daniel katsanishi tsetseshra katsayawishi tsityumishra si kuchanishi shruu-

kachanaty, (tsidyatrani kuukachanishi piwittawa),  
 16 shrue menashru Juda hatsi tseemishi kotyu ye paapa-  
 17 yu, katrutya dinyi dyu tseemishi tsi haityi katrutya si  
 18 nayawakusatyishi niya bami hawe si nu petya. E  
 tsaishra dyika ye tseemishi bami hake si ga-wakuni  
 19 paai. Etyu eiyal emi eyu tsaashityi tsikuunishi e  
 20 gayashityekuiyatyishi. She etyu amoma pitrana, tsa  
 kuku, ku tsa uanatrani-tsaashityi emi e nutraapayukutrusatyishi; she shrueshru menashru mame sutsime ayatytani n'taku. Towa tsa emi hama hemaku tsheshi gaishibishra e-kaetrani si yuku wai hema, tsa, tsatsi na hama emi e-n'tyekkunu. E tsi tsa we tsaashityi drutsitru tsaitranatyanu, tsatsi tsi sinani nitragukunu, she etyu tsaayatawishi ga-trutsi niya we tsaashityi drutsitru neyatraniku. She tsi emi eyu hau kutrayitsakuiyanu, Tu ai Christo, ku, Wa ai, bami truhima; she tsa kaimatsishi Christo tsheshi hawe n'tyekkuyatakusa, e tsa kaimatsishi prophet tsheshi, e hawe e-n'taapukusa mame tsi imi me tsheshi e tsi tyiemi-utrani, emi heya, tsi itye tsanu, tsaayatawishi puta yukuma ayatrutsei niya. Mu, tsa na e-kaetrani yuku yani shrawappe.  
 25 Emi heya tsi kutrayitsakuiyana: Mu, tsatdyau ai ga,  
 26 bami hake tyeeekuma. Mu, wa ai kaatya gaya ai  
 27 gaachu, bami truwahima. She emi butruwaishityi yue  
 ha ni kumusushi, e buniya ye tsiukumashratsita, tsika  
 emi taa n'taku hano ga-mutyi hawe tsunyekunishi.  
 28 She haityitsi shumu gaashra, tsika emi ai mashawi  
 naiwatyase-kusa.

29 Etyu we tsaashityityani sutsime ayatytani tu shrue  
 eshru hawina oshratra tsamishityitsi naitraku, e  
 tawatra tsatsi numashratsikunu, e shityita howaka si  
 nu pepeniku, e howaka tsishatsishi nyeyatsiwuku-  
 tsana-tsiwatrumasa. E shrue hano ga-mutyi ga-tyiemi  
 30 tsheshi howaka si nu mashra naitraku. Shrue eshru  
 gaishibishra dyu sai hano n'tratakusa, shrue niuka-  
 chana-kusa hano ga-mutyi howaka ga-henaty dyika si  
 dyu hawe tsunyekunishi, tsishatsishi niya e mame  
 31 naoya uamashitani niya. E ga-upeseyiyaimishi shra

n'yayataku, e mame nyeitsanaimeku, uputsi niya, e tyana shukuna si e howaka sai ai shra si gayaatawishi niwatyamekusa.

- 32 She fig hitrae uwaseni dyika si chuwayumitrana: Tu na ga-tsaashityuma shawutsi e masani hawe si tsityitani, shrutonimasa kashraityi haweku tsa. Tsika emi taa, sai tsi towa shruwakachanaty, putonimasa
- 33 haweku kaetranishi, bato tsiana hawe ena. Kaimatsi shrayitsakuiya, towa kikatsanishi hano tsatsi nitraitra-
- 34 tyukusatya menashru sai tsi towa e-kaetra. Howaka e gaishibishra nitraiattyukuu, etyu sa-mani tsatsi nitrai-
- 35 yatyukusatya. She etyu, we tsaashityi e we ura dyika, tsatsi hau hano kutonima, tsa, tsatsi puta Kaunamatsi
- 36 ga-upeseyiyaimishi, e tsatsi Iusi ga-mutyi, etyu nowe Naishityia tseshi. She hano ga-mutyi hawe tsunyeku-
- 37 nishi, wa emi Noah gaapi tsaashityi kushigayu. She tsa na kuichumuni tsaashityi tyaapetata e tyaashikaty-
- 38 kuiyana, tayawakuityita e tayawakuityitanitta, Noah kanue dyu kupuni tsaashityi hema, e tsatsi chuwayu
- 39 menashru kuichumuni e sai haupa yuku tsaitrutseyi, emi taa hano ga-mutyi hawe tsunyekunishi n'taku. Emi
- 40 eyu, dyue hatrutsai tsaishra ai n'taakuu; ishike yuku tsaayutsee, etyu ishika gaatyu. Dyue ku awayani dyika
- 41 n'trawayakuu, she ishike yuku tsaayutsee, etyu ishika gaatyu. Emi heya truwayukai, she haityi tsaashityi
- 42 kutra-huchanishi hawe si tsunyekunishi tsatsi shrutoni-
- 43 masatya. She etyu towa putonimasa, Tsi katrutya yani tseshi haityi uashityumi kuchawaya hawe tsunikunu
- 44 kutonima, gai nyiuashityiku, e tsatsi ga-ama nuheetsi-
- 45 kunu utroshityi. Emi heya, trutyumu haku tani; she tsa emi e shrutsityishitani, ai ura dyika hano ga-mutyi hawe
- 46 si tsunyeku.

- 45 She hawi tsiuhimatyishi e kutonimishi kotanitra tsa, wa ga-yani tseshi ga-ama si dyu itye tsiutranitya
- 46 emi heya chitye upbewi hawe nyewatraniku? Gaiuiyee-
- 47 tyia we kotanitra yani tseshi hawe tsutsi tsiyainaku taa tsekkuiyani. Kaimatsi shrayitsakuiya, sai heme gashi
- 48 ai dyu kuwatsa nitra-tsiuma. She etyu, tsi towa

- sutsime kotanitra ga-winoshika dyika e-katsanu: Sa-yani tseshi hawe tsunikunishi yuku tsityikuiya,
- 49 shrue shru mika kowatanitraniishi gayashukuiyanu,
- 50 e roku tsayatyita gaashikatyikuiyanatyanu, tsa emi e tsinaitrani tsaashityi e tsa kutonimi ura dyika, towa
- 51 kotanitra ga-yani tseshi hawe tsunyeku, e sai si nu nityatsinai-tsiuma e kauitutyityia ye nitasha-tsiuma. Ai niyetyikuiyaniku e hachani nyeiushikunutsitaniku.
- 25 Shrue Kaunamatsi itye-tshetra nushrugayuniku, katsi masitra ga-anatranishi kuwayetyeyawatyishi e
- 2 naudyatrakunishi tyiyaityamee hake tyemunityishi. E taama tsatsi kowakunimasatya e taama tsi tyiutoni-
- 3 masa. She tsa kowakunimasatyishi ga-anatranishi kowayetyeyawatyi tsatsi hau yui asaityi chuwash-
- 4 tyishii. Etyu kutonimasatyishi shipuna niya hau yui asaityi ga-anatranishi tyayashityishimitta. Shrue nau-
- 5 dyatraku yuku tsityikuiyani, masitra sai tyeepatatani e tyeepatyi, etyu suna gapushu ni hau tyushigaitsa, Mu,
- 6 naudyatraku, hawe piwataime! She masitra sai haupa tyeepatyuni, ga-anatranishi chuwayikame. E tsa
- 8 kowakunimasatyishi kutonimasatyishi tyayania, Kutra-asaityi gaiwachani, she sutra-anatranishi shikayaino-
- 9 shitata. She etyu kutonimasatyishi tyayipeyuta tyana, Tsi shru tsi tsa washu hishrome e hinome dyika
- tsanu, nake, tsishityiashi dyika ye tyekkuma, shrue
- 10 noyu tranatana. Shrue ai si yuku kayaniyeetyi, naudyatrakunishi hawe tsutyu, shrue sai haku kowat-
- 11 ranishi hake haupa tyiepu tsawakuitrani bashruku ye, shrue tsiana chaasha. Shrue hatsuma kaetrani, mika
- 12 masitra hawe si tyeeku, tyana, Yani tseshi! Yani tseshi! Gayaatawi! Etyu shrue tyayipeyuta, tyanata,
- 13 Kaimatsi shrayitsakuiya, tsatsi shrayitrunima. Emi heya truwayukai, she hano ga-mutyi hawe si tsunyeku-
- 14 nishi haityi tsaashityi ku haityi ura tsatsi shrutoni-
- 15 masatya.

- 14 Emi taa tse, hatrutsai ishika tiye hatsi dyika ye tsunyeku ni, ga-tanitranyaimishi tyiwayeotsa, shrue
- 15 tsi gaishimishi sai tsi ai tyaiwawishani. E haityi ishike

taama tsiwiyimi tyiuchani, e haityi ishike dyue tsiwiyimi, e tsika haityi ishika ishike tsiwiyimi, nowaina hatsumaku shikau-ityeetsanishi taiwachani, e shrue shru ai yuku tsutyu. She tu haikamiku taama tsiwiyimi kuishitawishi tyumu, shrue towa tayayaku, she tsika na taama tsiwiyimi ai dyu chuwitra. Emi taa tsika, dyue tsiwiyimi kuishitawishi tsika ai dyu dyue chuwitra. Etyu ishika, ishike tsiwiyimi kuishitawishi tyumu, shrue hatsi dyika nu chaoshitotsa, shrue gayani tsheshi ga-sawaka ai nu chuwakucha. Shrue maiku ai si yuku towa kowatanitra gaya-yani tsheshi hawe si tsutyuni, sai tsi niya hawe utranityi tyiwapeta. She taama tsiwiyimi kuishitawishi hawe tsutyuni, tsika taama tsiwishityimi hawe chuishitaiku, tyanata: Yani, tsheshi, taama tsiwiyimi tyuishityi, mu, ai dyu taama tsiwiyimi suwitra. Ga-yani tsheshi e-taatsakuiya, Tawae, tawa e tsiuhimatyishi kutanitra kuta! Tu hatsue dyika kutru-himatyishi me, tsi naoya dyika kuwatsa nitra-shroma. Kutra-yani tsheshi ga-uishityiaani hau upu. Shrue dyue tsiwiyimi kuishitawishi hawe tsutyu, tyanata: Yani tsheshi, dyue tsiwiyimi tyuishityi, mu, dyuishu tsiwiyimi ai dyu suwitra. Ga-yani tsheshi e-taatsakuiya: Tawae, tawa e tsiuhimatyishi kutanitra kuta! Tu hatsue dyika kutru-himatyishi me tsi naoya dyika kuwatsa nitra-shroma. Kutra-yani tsheshi ga-uishityiaani hau upu. Shrue tsika, ishike tsiwiyimi kuishitawishi hawe tsutyu, tyanata: Yani tsheshi, siutoni hatsumaku shitutsi kutyeshi, shruwaityita tsa emi ai shrautyimishra, e shiwayatyu tsa emi hawe shru-shramatsitanishra ye; she sputsani, shrue siumu, hatsi dyika nu kutra-tsiwiyimi suwakucha. Mu, kutrashi kutra. She etyu ga-yani tsheshi tyipeyuta, taatsakuiya, Sutsime tsiusa kotanitra kuta! Shrutoni suwaityanishi tsa ai sa-utyimishra, e si-watyasushi tsa ai suishramatsitanishra ye; emi heya gaika sawaka sawaka ai uishitani ai nishita-shru, she hawe si tsu-si sawaka sashi e tsika kaushitanishi ai dyu kayamishi si niushita-si. She emi heya pusatyuatsana

towa ishike tsiwiyimi, shrue katsi tsiwiyimi kui-shitaikkuiyanishi piushityitta. She sai heme hauts kuishitaikkuiyanishi nyiwashityiyiku, shrue niwimu-tsiuma, etyu hautsi tsa gashra, e meyu etse tsi gash niyesatyutsiku. E tsa tsishiyaukuiyanishi kotanitra chaatya tsamishityitsishra ye niutyikumi-kutrusa. Ai niyetyikuiyaniku e hachani nyeiushikunutsitaniku. Etyu hano ga-mutyi hawe si tsunyeku ni, ga-uamashitani niya e sai heme tsityumishi ga-upeseyityaimishi niya, emi eyu uamashitani ga-kuiyanishra ai dyu nukuiyaku, e ai yani shra sai hano naiwatyamekusa, shrue nyiyatakuiyaku kanieru gawaa garawashi dyika si yuku kanieru gayatawishi me; she kanieru shrumikawaya nu niyataku, etyu garawashi ishuya nu niyataku. Shrue Rai tsheshi ga-shrumikawaya nu tseemishi nyeytsakuiyaku Tuwe, sa-naishityia kutru-wakutsanishi, chuuiyaana itye-tsheshra gaishibishra gamatsaishra kaetrani haku kutraiwantrantityishi; she si-yamashityi tyutyishana, si-panoshityi tyuishikatana, tsayatanyei suta tyushutsana, hanami suta e tyuwakuna, shikuwasaty tyuutanye ye, utsitani si-chupi e hawe kutyeeku. Shrue shrami tsaaputyishi nyipeyutana-kusa, trana-kusa, Huchani hama shiyamashityi shraukachana e shra-tyishana? Ku shipanoshityi e shraishikatana? Hama shayatanyei shraukachana e shraushutsana? Ku hanami-kuta ni e shrawakuna? Ku hama shraukachana kutruwasaty ku utsitani shraachupi e shrautanye ye? She rai tsheshi nyeyipeyuta-tsiwatruma nyeytsakuiya-tsiwatruma, Kaimatsi shraytsakuiya, hatsumaku ishike towa drusishu haityi sa-tyumutyaimishi e-shraiwatranitya, tsika emi hinome hemaku e-tuitrana. Shrue tsika ishuya ai nu tseemishi nyeytsakuiyaku, Sutsishuni kutraituyupinaimishi, hinome dyika si yuku tyeeekuma, hake ai shruwatyamu e ga-upeseyitanityaimishi haku tsaiwantrantityishra tsiyakamitse tsipashi ye nu. She si-yamashityi e tsatsi tutyishanaty; si-panoshityi e tsatsi tuishikatantaty; tsayatanyei suta e tsatsi tuushutsanaty;



hanami suta ni tsatsi tuwakunaty; shikuwasaty e  
 44 utsitani si-chupi, e tsatsi tutanyetya. Shrue tsika  
 nyipeyutanakusa, natranakusa, Huchani, hishrome  
 hama shraukachana shiyamashityi, ku shipanoshityi ku  
 45 shayatanyei, ku hanami kutaa ni, ku kutruwasaty, ku  
 utsitani shra-chupi, e tsa shrawikashanaty? Shrue  
 nyeyepeyutaku nyenataku, Kaimatsi shrayitsakuiya,  
 hatsumaku ishike towa drusishu tseshi tsatsi e-  
 shrayiwatranitya, tsika hinome tsatsi e-tuitranaty.  
 46 She towa tsiyakamitse utsitani dyika ye n'tyeekusa,  
 etyu shrami tsaaputyishi tsiyakamitse iani dyika ye.

26 She e-chaetra, Jesus sai tsi towa mani gau-  
 2 naottani, gaisomeshitanishi tyayitsakuiya: Shrutoni-  
 masa dyue dyika nu tsaashityi si uiatyuni bashruku  
 n'taku, e hano ga-mutyi hau nyekuyana-tsaomasa,  
 3 shukuchatsi dyu nyepukakatsanaku. Shrue yani  
 tseshi chayani tsaaputyishi e tsidyatranikusana e hano  
 dyika tsaya tsaaputyishi chawatyami Caiphas tsaania-  
 4 tyishi yani tseshi chayani ga-ama dyika; e tyaatsia  
 gowa Jesus tsiuishikumashityi nityattakusatyishi e  
 5 naottawa-kusatyishi. Etyu tyaana, Tsatsi bashruku  
 tsaashityi dyika, tsi shru tsi hano ganashiyani tsaya-  
 tranu.

6 She Jesus Bethany gaapi, Simon leper tsiwawasa-  
 7 tyishi ai ga-ama tyaa, kuitsa hawe tsutyu, alabaster  
 dyuni niya tsityumishi ayaitani hawe chushitaikku,  
 8 shrue ga-nushika dyu tyiwayani kauyetaukuiyani. She  
 gaisomeshitanishi towa kuukachanaty tsatsi tyiwa-  
 shranitya tyaana: Tsi haityi niya towa tsiuyataani?  
 9 She towa ayaitani naoya niya niushaniku, shrue amome  
 tsaaputyishi nyewachaniku. She Jesus kuwittawani,  
 10 tyayitsakuiya: Tsekoma towa kui-tseshi shrupakatai-  
 tyia? She tawa tsitanitrani e-shikutrani. She amome  
 tsaaputyishi dyutsishrutse kutrayayaa, etyu hinome  
 12 tsatsi dyutsishrutse kutruwatatsa. Shrue towa ayaitani  
 sini dyu shikuwayanittyishi haku shikuutrani  
 13 nyetyaitsime-shikaomasatyishi. Kaimatsi shrayitsa-

kuiya, haityitsi towa tawa-mani tsi katsanishra sai  
 gaishibishra dyu, tsika towa kui-tseshi e-tsitrinishi  
 utyumityishi niya niupetaniku.

14 Shrue katsi dyue tsitra ga-amatsityaimishi si, ishike  
 Judas Iscariot E-tya, yani tseshi chayani dyika ye  
 15 tsutyu, e tyayitsakuiya, Tsi nyeeptyumasa, shrue  
 hinome hau nyeiwatyi-shrawatuma. Shrue chami-ya-  
 16 katsi shamutshishi sawaka tyiyasitrannitta. She ai si  
 yuku tyiyaipatyikuiya gowa itye hau nikuyakunishi.

17 Shrue tsa kashratyi gayatsishi semita bashruku  
 ishike tsaashityi dyika, ga-amatsityaimishi Jesus dyika  
 hau tyeeku tania: Hatyi haku piitrana-tyuwatruma  
 18 towa bashruku uyatawi? Shrue tyayitsakuiya: Tsaashi-  
 tyitra hake tyeekuma haityi hatrutsai dyika e-nyenia-  
 kutrusa, Tsayasomeshita kanata, Suityimishi hau  
 seetsi, uiatyuni bashruku kutra-ama dyika sa-umatsi-  
 tyaimishi e hinome ai bashruku niwautra-shikuwatruma.  
 19 She ga-amatsityaimishi emi e-tyitrana gowa Jesus  
 tsayayanikuiyashi; e uiatyuni bashruku haku tyitrana.

20 Shrue shapuka ni, ai si nu chukuiya, katsi dyue  
 21 tsitra ga-amatsityaimishi tseema. E gaapetyi, tyanata:  
 Kaimatsi shrayitsakuiya, ishike hau ye emi kutaapu  
 22 hinome nikuyatyuma. She mame ayamatyusa, shrue  
 23 sai haupa ishika na tania; Huchani, Aku hinome? E  
 tyaipeyuta tyanata, Waishitani dyika nu ishikawa si-  
 shikumetanutyitsishi, emi wa hau nikuya-shikuma.  
 24 Hano ga-mutyi emi e tsaudyatranatyishi emi taa  
 tsunyeku, etyu eiya tuwa hatrutsai hano ga-mutyi hau  
 nikuyakunishi! Mina tuwa hatrutsai tawa niutraniku  
 25 tsi tsa tsiianu. Shrue Judas hau tsikuyanishi tyiyeputa  
 tyanata: Tsayasomeeshita, Aku hinome? E taatsakui-  
 ya: E shratsa.

26 E gaapetyi Jesus semita tyita, tyiunamatyi,  
 chaotsayutsa, e umatsityaimishi tyaiwachani e  
 tyanata: Chuwanetyeyawa, traape; towa sa-sini tsa.  
 27 Shrue ushikatyi chayaawi tsunamatyi tyaiwachani,  
 28 tyanata: Towa si haupa traashikata; she towa  
 tsiushranishi sa-matsi tsa, wa naoya kuwatsi niya

29 tsiwatsemuni, heya ukitsishi uwataipunaimi. Etyu e-shrayitsakuiya, tui si yuku towa mataiku kiwa tseshi si tsiuitranishi tsatsi na niishika-shikunu, menashru we tsaashityi hama natsi tseshi wa ai sa-naishityi ga-itye-tseshra dyika nutraashikata-shrusa.

30 Shrue kowatruityatyi Olive kotyu ye tyeeuku.

31 Shrue Jesus e-tayitsakuiya: Sai haupa nyeyanachupatsi-kutruwatrumasa towa gapushu, su-tsi niya; she emi e tsidyatrani,

Kanieru gawaa niuppaitsi-si, shrue tsiwatsishi kanieru sai ai shra nushramatsaku.

32 She etyu tsika na dyu sipaty ni, Galilee ye, hishrome

33 dyika ai yani, tsunye-si. She Peter tyipeyuta e taatsakuiya: Bato tsi sai hano shrutsi niya nyeyanachupatsi-tyiwatrumasanu, tsatsi hama hinome niyanachupatsi-shityaomasatya. Jesus e-taatsakuiya: Kaimatsi shraitsakuiya, towa gapushu, tsa na kowaku kushigaitrani, chami-ya wa nyenata-shru tsa tyunimishi.

34 Peter e-taatsakuiya: Bato tsi ishikawa tutraashitoniku, mame e tsatsi nyenata-shikunu tsa shranimishi. Emi tsika taa sai umatsityaimishi tyana.

35 Shrue Gethsemane ai tsaanimasatyishra Jesus e ga-umatsityaimishi hau tyeeuyu, e umatsityaimishi tyayitsakuiya: Tui si nu chaata, mena hinome yuke tsunye-si ai amoma nitra-si. She tyayitruuse Peter e Zebedee dyue ga-mutyityaimishi, shrue mame ayamatsi e ganashiyani tyitra. Shrue tyayitsakuiya: Samaiani mame ayamaku, hushitoni ye. Tui tyeemi e uyukaini kumatsanitta. Shrue drumu yuku tsutyu e kowawi niya nu chaaiti, amoma tyitrani e-chatsa: A, Sa-naishityia, tsi emi e n'takunu, towa ushikaty piyatyu, hinome dyika si; she eku etyu tsatsi sa-uyanishiniya ka, etyu emi kutra-uyanishiniya.

36 Shrue umatsityaimishi dyika hau si tsutsi, tyiwayaina tsepaiityi, e taatsakuiya Peter: Tsi, gao tsatsi ishike ura uyukaini niyumatsanityuma? Truyukai e amoma pitra, tsa niyetana-kutrumasatyishi niya ka. Kaimatsi maiani mame gauttuwi, she etyu sinami tsatsi tsishatsishra.

37

38

39

40

41

42 E tsika na hamashutse yuku si tsutyu e amoma tyitrani e-chatsa: Sa-naishityia, tsi towa ushikaty tsa niyetyikunu, tsi tsa sishikaty, kutra-uyanani e-paitra.

43 Shrue hawe si tsutsi tsika na tyuwayaina tsepaiityi, she mame tyepakuiyana. E tsika na tu tayatra, yuku

44 si tsutyu, e chami-ya tse amoma tyitra, tu emi e tsika na e-chatsa, Shrue ga-umatsityaimishi dyika hau tsutyu e tyayitsakuiya: Gaityishru tyepaiyi e chuwanatrana. Mu, Shru ura hau tsaatsi, e shrue hano gamutyi kokitsityia gayamashityi dyika hau tsaakuyana.

45

46 Dyu tyepatyuni shraoshru n'tyeeuku. Mu, hau shikudyanishi tuwe tsaatsi.

47 Tu na katsani, mu, katsi dyue tsitra si, ishike, emi Judas tseshi, hawe tsutyu, e tsi hanowishi hawe tyayitruuse, ishikari e upaitsi kaatyeyanaty, yani tsaaputyishi chayani e yani tsaaputyishi hano dyika si.

48 Shrue hau tsikuyanishi utyiemitrani tyayiwatranityanata: Hautsi haiytyi si-utsutsanu, emi tsa; pityata.

49 She tu haikamiku Jesus dyika hau tsutyu, tyanata: Gowa tsi, Tsayasomeshita. Shrue tyiutsutsa. She Jesus e-taatsakuiya: Sa-ukini, tsi kutyiyushanishi e-pitra. Shrue hawe tyeeuku e Jesus tsityataty tyiyutsee.

50 E mu, haiytyi Jesus ai tseemishi kamashityi dyu e tsitrani, ga-ishipari dyu tyuku, shrue yani tseshi chayani ga-tanitrani tyupaitsa, tsippe yuku tyuttra.

51 Shrue Jesus e-taatsakuiya: Kutra-ishipari ga-uchupishra hake si nu pipunai; she sai haupa ishikari kayaakunishi, ishikari niya yuku nyiwakawawiku. Ku trutsityishita, sa-naishityia nowapeotsa-sinishi tsa itye sutyeshi, e shrue eshru katsi dyue tsitra yuku gowatsikumishi lusi ga-upeseyityaimishi hawe niuyatani-shikuma? Kume emi gowa tsidyatranishi e-naitraku, sekka towa e-n'tyeeuku? Emi eyu ura Jesus tsi hanowishi dyika tyayitsakuiya: Hawe tutyeeuku kuchawaya nityata-kutrusatyishi me, ishikari e upaitsi shratyeyanaty nityata-tyumasa? Na no tsama tsityumi-katruytya ai si si, seyasomeshitani, e tsatsi tyutyataty. She etyu towa sai heme prophet tseshi dyika si tsidyatranishi

52

53

54

55

shru kaimatsi kaetra. Shru sai ga-umatsityaimishi tu tsitranatya tyaapayu.

- 57 She Jesus tsityatatyishi yuku tyiyutsee chayani yani  
 tseshi Caiaphas dyika ye; ai tsidyatranikusana e tsaya  
 58 tsaaputyishi kaiwatyamishra. Etyu Peter Jesus ai  
 kaatya tiye ye hamashu chaanitrutyaya, chayani yani  
 tseshi ga-ama ai yani dyika hema, shru hau tyeepu, e  
 kowachani tseema ai si nu chukuiya, kuinaottanishi  
 59 ukachani. She chayani yani tsaaputyishi e sai kaiwa-  
 tyametyishi tsa kaimatsishi shityishityiku tsaaputyishi  
 tyuwatyaipana emi heya niyumwatsana-tsiumasatyishi;  
 she etyu tsatsi tsi tyiainawatya, bato tsa kaimatsi  
 60 shityishityiku naoya hawe tyekuiyiku. Etyu hamashu  
 tse dyue hawe tyeeyu tyanikuiya: Towa hatrutsai  
 61 kanata, Hinome itye Iusi ga-tsityumi-katrutya punye-  
 si, e chami saiku si naatra-si. She chayani yani tseshi  
 62 dyu tyutatyu, e Jesus taatsakuiya: Tsatsi tsi nyeya-  
 peyutatu? Tsi emi towa hishrome dyika shityishityiku  
 63 tsitranu? Etyu Jesus maku-tyu. Shru chayani yani  
 tseshi tyipeyuta tyanata: Tsianishi Iusi niya ka  
 shraukashitaya, niwapetyuwa-trumanishi tsi hishrome  
 64 emi Iusi ga-mutyi Christo kutyeshi. Jesus taatsakuiya:  
 E shratsa. She etyu shrayitsakuiya, tui yani niukacha-  
 na-kutrusa hano ga-mutyi, itye shrumikawaya si dyu ai  
 nikunishi e howaka henatyi dyika hawe tsunekunishi.  
 65 Shru chayani yani tseshi ga-wakuni chaoshratsitsa  
 tyanatani: Sutsi-me kotsetatya! Tsekoma mina shityi-  
 shityiku shikuwatsipu? Mu, shru sutra-kani sutsime  
 66 e-katsanishi. Gowa shruwatsityishityia? Tyipeyutana  
 67 tyana: Upinaimi ushitoni tsa. Shru kowawi tyishupu-  
 tsana e tyiutyuwitsana, e mika gayamashityi niya  
 68 tyiutyishatsana, tyanatata: Gayityemitra, Christo kuta,  
 hawi kutru-tyishatsanishi.  
 69 E Peter katrutya ai yani chaatya si tyaa. Shru  
 maku-tsa hawe tsutyu e taatsakuiya: Tsika emi  
 70 hishrome Galilee-me Jesus shru-tyisutyu. Etyu sai  
 haupa ai tseemi tsatsi kaimatsishi tyanatasa: Tsatsi  
 71 shikutonima tsi shranatanishi. E chaatya ai katrutya si

- kouameshityishi ye kumuni ishika tyiukacha, shru  
 tyayitsakuiya ai tseemishi: Towa hatrutsai tsika emi  
 72 Nazareth-me Jesus kuutyisutyu. E tsika na chaakaesu-  
 nishi niya e katsa: Tsatsi he hatrutsai shikunima.  
 73 E hatsumashu ai si tseechanishetyishi hau tyiwatsekkui-  
 yi e Peter tania: Kaimatsi, trutyumu emi ai si kuta, she  
 74 shratsanishi niya kutyi-mashrutsita. Shru shru sutsi-  
 me tyutsetatyu, e chaakaesu: Tsatsi he hatrutsai  
 shikunima. She tu haikamiku kowaku tyushigaitsa.  
 75 She Peter ee-tyu Jesus e-katsanishi mani: Tsa na  
 kowaku kushigaitsa ni chami-ya, wa nyenata-shru, Tsa  
 tyunimishi. Shru si tyumu e mame chatyikuiya.  
 27 She gayutse kaetrani, chayani yani tseshi e hano  
 tsaya tsaaputyishi chaiwatyami, Jesus dyika gowa  
 2 naottawa-kusatyishi. E tsiupashityanittatya, e yuku  
 tyiyutsee, e Pilate dapopo tseshi ye hau tyikuyana.  
 3 Shru Judas, hau tsikuyanishi, Jesus niyemutyi-  
 tsawa-tsiumasatya kuitawanatyi kuukachani si chuupa-  
 kutsa e shru chami-ya katsi shamutsi sawaka chayani  
 4 yani tseshi e tsaya tsaaputyishi hau si tyisha, tyana-  
 tasu: Sokitsa, tsa gapinaimishi matsi hau si-kuyanishi  
 niya. Etyu tania: Tsi haityi he gowa sutaa. No he  
 5 trutsitawa. Shru shamutsi sawaka tsityumi-katrutya  
 ye nu chaukuiyawu, shru si tyumu e ai si yuku tsutyu e  
 6 chutotya. E chayani yani tsaaputyishi shamutsi  
 sawaka chuwaushitawa, shru tyana: Towa tsatsi itye  
 uishitanishra ye nu niushitanikunu, she matsi kaya-  
 7 mishi niya tsa. Shru heya tyatsia e dyuni kowauityi-  
 tyia gaatsitya emi heya tyanatana, nanami hano ai nu  
 8 ai-ityaitsimi niya. Emi heya we tsaishra tania, Matsi  
 9 tsaishra, mina wai. She prophet tseshi Jeremiah e  
 katsanishi e-chaetra, tyanata:  
 E chami-ya katsi shamutsishi sawaka chauku-  
 yawa, towa tyityuminishi tsityu-taaitranishi, towa  
 emi hatsue Israel ga-mutyityaimishi tu me  
 tsityu-tyitranityi; e dyuni kowauityityia gaatsitya  
 towa tyaiwakuita, emi e Huchani shiku-yaniku-  
 10 yanishi.

- 11 She Jesus, dapopo dyika ai yani si chutyatsi, e dapopo tyupeta tyanata: Gao emi hishrome Horiyu dyika Rai tyuta? She Jesus e-taatsakuiya: E shratsa.
- 12 E chayani yani tsaaputyishi e hano tsaya tsaaputyishi tyiupinaimittatyishi tsatsi tsi tyamashra. Shrue Pilate e-taatsakuiya: Tsatsi tsi traka hatsu tsi kutyi-upinaimetyishi? E tsatsi tyipeyuta, tsatsi ishike mani puta;
- 13 emi heya dapopo mame imi ma tyitra. She emi e bashruku kaetyita ni, dapopo emi e chauyukai ishike tsiutsitani atoinaimi, tsi hanowi dyika ye, haityi tsiwatsiputyishi. She emi eyu ai tyuwachu mame tsaanimasatyishi tsiutsitani, Barabas tsaniatyishi.
- 14 She emi ai kaiwatyametyi, Pilate e-tyayitsakuiya: Haityi si nyewakuyani-shrawatruma, Barabas ku
- 15 Jesus, Christo tsaniatyishi? She tyiutoni hau tsakuyanatyishi ukeso niya ka. E tu na ayatanikuiyani anamatyi ai si dyu gaapi, ga-okui hawe tyikuiyani taatsakuiya: We kuitonimishi hatrutsai niya bami hau chayupunai, she wai mame tsi naoya sunatyume,
- 16 hitseshi niya, towa hatrutsai kutsi niya. E chayani yani tsaaputyishi e tsaya tsaaputyishi tsi hanowishi tyuwakashitaityia Barabas uitani, e Jesus uttawi. She etyu dapopo tyayipeyuta tayitsakuiya: Haityi towa dyue si nyewakuyani-shrawatruma kutruwatsipu? Shrue tyanata: Barabas. She Pilate tayitsakuiya: Shrue emi kui nitra-si Jesus, Christo tsaniatyishi? E sai heme tania:
- 17 Shukuchatsi si nu peetotyana. She dapopo tyanata: Tsekoma? Tsi kui sutsi tseshi tsitra? She etyu mina mame tyiwashigaitsita: Shukuchatsi si nu peetotyana.
- 18 She Pilate kuukachani tsa haityitsi heya kui nitrakunishi etyu tu heme ganashiyani naitrakunishi, tsitsi kushitanu chaamawaishityi tsi hanowishi dyika yani, tyanatani: Towa kuitonimishi ga-matsi dyika tsatsi shika-pinaimishra. No he truwatsitawa. Shrue sai hano tyipeyutana, tania: Ga-matsi ai dyu nutrashi e shra-iatratyaimishi dyika dyu. Shrue Barabas hau si tyaiwatyi, etyu Jesus kushayani hau tyikuya, shukuchatsi si nu nietotyana-tsaomasatyishi niya.

- 27 Shrue dapopo ga-sentaru Jesus aiwatyami-gaya hake tyiyutsee, e ai shriena chashrana gowatsikumishi
- 28 sai sentaru. E tyiwakunityutawa, e kukani utyushityi tyiwakuna. She gayaanaty niya ushityatsutsi chuwa-wamitrana, shrue ga-nushika ai si dyu taashityatsutsa; e ishitowa kiwa tseshi shrumikawaya kamashityi
- 29 taaape; e ai yani si nu chaashitotruma tyumayanikuiyana, tania: Gowa tsi, Horiyu ga-raishi! E tyishuputsityia, e ishitowa kiwa tseshi kayaawatya, e ganushika dyu tyiupaitsana. E shrue kumayanikuiyanaty, utyushityi tyutyutawa, shrue ga-wakuni si tyiwakuna; shrue yuku tyiyutsee, shukuchatsi si nu utotyani niya.
- 30 Hawe si tseemuni, Cyrene-me hatrutsai tiyainawa, Simon E-tya; towa shukuchatsi aikkuinyani taauitrana.
- 31 She Golgotha ai tsaniatyishra (Towa mani tseshi niya nushigaini ta) hau tseetyupi, wino e kawitsitrani gayatsi taashikatana; she etyu shikutani tsatsi nushikatayunu. Shrue shukuchatsi si nu tsatotyanaty, ga-wakuni chayachana, shrue tyayinaani. Emi heya prophet tseshi e-katsanishi e naitrakunishi niya: Kayachana sa-wakuni, e dinya nu sa-wakuni towaya kayainaani.
- 32 E ai si nu kaataya tyiyukai, E ga-nushika dinya ye tsi shityia tsaupinaimetyishi ai tyityishityuime tyidyatrani, TOWA JESUS HORIYU GA-RAISHI TSA. Shrue dyue kuchayawanu ai shriena dyu shukuchatsi si nu taatotyanu, ishike shrumikawaya si nu, e ishika ishuya si nu.
- 33 E ai shra tsekkuiyanishi tyiumahanikuiyana, chayannushikai-wutsutsita e tania: Tsityumi-kastrutya pupushanishi e chami saiku si naatrashrunishi chaitragu! Tsi ma ima Iusi ga-mutyi kutanu, shukuchatsi dyika hawe si nu utya! Emi taa tsika chayani yani tsaaputyishi e tsidyatranikusana e tsaya tsaaputyishi tyiumahanikuiyana tyana: Mika gayatragusu, etyu tsatsi noyu itye naitragukunu. Tsi ma ima Israel ga-rai tsanu, shukuchatsi dyika hawe si nu piitya, shrue niuhima-

- 43 tawana-sutrusa. Wa Iusi dyika tyiuhima, shru piitragu,  
tsi tsitsipushra; she kanata, Hinome Iusi ga-mutyi suta.
- 44 Shrue tsika kuchawayanutyu shukuchatsi si nu tsaato-  
tyanatyishi ai shriena, emi taa tsika sutsime taniaputyu.
- 45 Shrue shichisu ura dyika si yuku mayuka ura dyika  
46 hema sai ai shra hatsi dyu tamishiyitsi, E haityitsi  
mayuka ura dyika Jesus tsishatsi tyusheetsa,tyanatasu:  
Eli, Eli, lama sabachthani. Towa tsityarapatyitrani tsa:  
47 Sa-Iusi, Sa-Iusi, Tsekoma hinome tu tyuittra? E hau-  
tsi ai tseechanishetyishi towa kakanaty tyana; Towa  
48 hatrutsai Elias kuppeotsita. E tu haikamiku tseechani-  
shi ishike tyumitsa e utsishrukaimi tyita, shrue ka-  
washitanishi niya tyiuttsihrukaii, shrue ishitowa  
drutrutyai si dyu e tyitra, shrue hake dyu tyiuttyi,  
49 ushikaty niya. E mika tyana: Tu pitra. Hanye  
niukachana tsi Elias hawe tsunyetyu e nitragu-  
tyuma. E Jesus tsika na tsishatsi kusheetsani, ga-  
50 tsatsi sai dyu tsaka. She mu, tsityumi-katrutya ai si nu  
kouametsishi suna si nu shratyiti, dinyami drutrutya  
51 si nu hau nu nukamishuku tsaatsinishi; e hatsi chuwu-  
kutsa, e yaoni peetatya; e ai-ityaitsimi chaatana; e  
52 naoya tseepaityishi tsityumishi hano ga-tsinishi si dyu  
tyeepatyini, e Jesus si dyu tsiipatyini si yuku ai-  
ityaitsimi si dyu tyeemu, shrue tsityumishi tsaashityi-  
53 tra hake tyeeuku, e naoya tse dyika ye hawe chuwatyie-  
mitrana.
- 54 E katsi-wa-katsi sentaru dyika yani tseshi, e ai  
haupa tseemishi Jesus tsiyukaiityishi, hatsi kuwuku-  
tsani kuukachanaty, e sai tsi towa e-kaetranishi,  
mame ma ima chaaputsa, tyana: Kaimatsi towa Iusi  
55 ga-mutyi ta. E naoya kuiyawitra tiye si tyiyukaiyi, emi  
Galilee si Jesus dyika hamashu tyekkuiyishi e tyuika-  
56 shana. E tyiwataa Magadara-me Mary, e James e  
Joses gaa-naia Mary, e Zebedee ga-iatratyaimishi ga-  
naia ai tyee.
- 57 Shrue shapuka ni kaetra ni, riku-tsa hatrutsai hawe  
tsutyu, Arimathea-me Joseph emi E-tya, tsika emi  
58 noyu Jesus tyisomeshita. Wa Pilate dyika ye tsutyu,

- shrue Jesus ga-tsini chuwittaa. She Pilate chuwaya  
59 tsini aapi. Shrue Joseph tsini kayaawi, natsi chanana-  
60 tsishi niya shruni dyu tyipunaii. Shrue noyu natsi ai-  
ityaitsimi yaoni dyika kaoshitotsanishra ai gaya tyicha,  
shrue ai-ityaitsimi tsiama dyika tsichu yaoni hau si  
61 tymakatawa, shrue ai si yuku tsutyu. She Magadara-  
me Mary e ishika Mary ai-ityaitsimishra ai yani si tyaa.
- 62 Shrue ai na nu tsaashityi emi eyu ai haku utyitani  
ai na nu tsaashityi, chayani yani tsaaputyishi e Parasai  
63 hafo Pilate dyika hau tyeeuku, tyana: Huchani, ee-  
trusa we tsayawitutyita kanatanishi, tu na tsiianishi,  
64 Chami sai kaetrani tsika na si nipaty-si. Emi heya  
chuwaya ai-ityaitsimi bashruuni menashru chami sai ai  
yuku tsaashityi, tsi shru tsi gaisomeshitanishi gapushu  
ni hawe tsekkuiyu, shrue ai yuku tsichawanatya. She  
hano niyama-kusa hushitoni si dyika si dyu tsiipatyu,  
emi heya tsaya dyika si chai tsiwippishi mame mina yuku  
65 sutsime n'taku. Pilate e-tayitsakuiya: Kowawashi-  
tyu kutrashi; tyekkuma hatsumaku kutrusatya bashru  
66 pitrana. She tyeeekuma, shrue ai-ityaitsimi bashru  
tyitrana, yaoni chauyaushikame e kowaashityu ai si  
taakuiyana.
- 28 She uanatrani tsaashityi kuinaottani, Domiku  
ishike tsaashityi gaishipitratyani, Magadara-me  
Mary e ishika Mary ai-ityaitsimi tyuukachanyetyi hawe  
2 tyeeuyu. E mu, mame hatsi chuwukutsa, she Iusi ga-  
upeseyi kowatyuma si nu tsutyu, shrue hawe tsutsi  
3 yaoni tsiama yuku tymakatawa, shrue ai si dyu  
chukuiya. Kowawi butruwaishityi ma tye, e ga-wakuni  
4 hawe me shamutyi; e chaaputsanaty kowawashityu tu  
tyayaitunutsita, shrue kushitonishi me e-tayatra.
- 5 E Iusi ga-upeseyi kuitseshi tyiipeyuta tyaaatsakuiya:  
Bami chuputsanu. Si-utoni Jesus shiyaipatyu, shu-  
6 kuchatsi si nu tsaatotyanatyishi. Wa tsatsi tui gakunu,  
she si dyu tsiipatyu emi e-katsanishi. Hawe, pu-  
7 kachanatyu hatyi tsiikaityishra. Shrue haikamiku  
tyeema puwapenutyu gaisomeshitanishi si dyu tsiipa-

MATTHEW 28

- 8 tyunishi. E Mu, tui yani kutruwa-tsuku, Galilee ye. Ai niukachana-kutrusa. Mu, shrawappe. She tu haikamiku ai-ityaitsimi dyika si yuku tyeeyu, kuputsanishratyu e tsiuishityiani. Shrue tyuumitsa, gaisomeshitanishi dyika ye towa mani ayaikkuimittyi. She gaisomeshitanishi gowapenyetyi tyutsi, Mu, Jesus taawatayi tyanatasu, Gowa tsi! Shrue hau tyeeyu e kashityi si tyityatyu e tyuumashitanityu. Shrue Jesus e-taatsakuiya: Barni chuuputsanu. Nake, puwapenyetyu satyumutyaimishi Galilee ye nu n'tyeekukusa. Shrue ai niukachana-shikumasa.
- 11 She hake tseeyatani, mu, mika kowawashityu tsaashityitra hau tseetyupi chayani yani tsaaputyishi tyiwapenatya sai tsi kui kaetranishi. Shrue chayani yani tseshi e tsaya tsaaputyishi haupa kaiwatyametyi, e ai shra katsiatyi, sentaru naoya sawaka tyaiwakuitta, tyayitsakuiya: N'trana-kutrusa, gapushu ni gaisomeshitanishi hawe tsekkuishshi, shrue tsichawanatyishi, sutyepaiityi. E tsi towa dapopo kakanu, niukashitaitya-sutrusa, e emi heya tsatsi tsityishityi-nutrusa-kutrusa ye e-nitrana-sutrusa. She sawaka chaukkuiyawa; e emi e tsayayanikuiyanatyishi e-tyitrana. E towa anatani Horiyu dyika ye sai shra tyiupetani, mina wai hema.
- 16 Shrue katsi ishike tsitra ga-umatsityaimishi Galilee ye nu tyeeku, kotyu tshesha ai Jesus taiwapenittyishra. She kuukachanatyi tyuumashitana, etyu hatsue tsa tyiwahimatya. Shrue Jesus hau tsutyu e tayitsakuiya: Kaunamatsi dyika e gaishibishra dyika dyu sai itye hinome shikaapi. Emi heya tyekkuma, sai hanowishi kaisomeshityia payatra, Naishityia e Amutyi e Kuukimuni-Maiani E-gashi dyika ye baptisma niyatyityia-kutrusa. Sai tsi shrayayanikuiyanishi ayukaii nyeyisomeshityia-kutrusa. E Mu, sai heme tsaashityi gaishibishra kuinaottanishi hema sayiwatyimusu.

